




КОМИ  
КЫВ

3





Т. И. ПРОКУШЕВА, О. И. ИЗЪЮРОВА, Е. А. КУЗИВАНОВА,  
С. А. МИШАРИНА

# КОМИ КЫВ

## Коймөд класслы велөдчан небөг

*Вынсьөдiс*

*Коми Республикаса йөзөс велөдан да  
Вылыс төдөмлун министерство*

СЫКТЫВКАР  
ИЗДАТЕЛЬСТВО «АНБУР»  
2007

**ГОУДНО КРИОИПК**  
**ЦЕНТР ПО РАЗРАБОТКЕ**  
**УЧЕБНО-МЕТОДИЧЕСКИХ КОМПЛЕКТОВ**  
**НАЦИОНАЛЬНО-РЕГИОНАЛЬНОГО**  
**КОМПОНЕНТА**

81.2 Коми—9  
К63

*Велодчан небөгсö лэдзны дасьтöма  
Коми республикаса образование сөвмöдан да  
кадрьяс дасьтан институтын*

**Прокушева Т. И., Изьюрова О. И., Кузиванова Е. А., Мишарина С. А.**  
К63 Коми кыв. Коймöд класслы велодчан небөг.— Сыктывкар: ООО  
«Анбур», 2007.— 128 л.б.

ISBN 5—7555—0896—8

81.2 Коми—9

*Условнöй пасьяс*



— выль тема восьтигöн удж



— текст, текст серти юалöмьяс да уджьяс



— содтöд удж



— кывкуд, вежöртас гөгөрвоодöм

кöч<sup>1</sup> — видлавны кывсьыс шы да шыпас

рудов<sup>2</sup> — видлавны кывсö тэчас серти

чечча<sup>3</sup> — тöдмавны кивсикас

Кöч йöктö, йöктö<sup>4</sup>. — висътавны да визьнитны сёрникузьясь юкөдьяссö

лэбны<sup>5</sup> — вайöдны öткодь кыввужья кывьяс

\* 80 удж — татшöм паса уджлы небөг помын эм воча кыв

© Прокушева Т. И., 2007

© Изьюрова О. И., 2007

© Кузиванова Е. А., 2007

© Мишарина С. А., 2007

© Шаргородская Т. Г., оформление, 2007

© Шарипков Г. Н., оформление, 2007

© ООО «Анбур», 2007

ISBN 5—7555—0896—8




**1 удж.** Лыдды, петкөдлы гөлөснад кывбурлысь кыпыд-  
лунсö.

Бара мича öшкамöшка  
Кусыньтчöма мегыр моз.  
Бара тыдалöны мөсьяс  
Улич помын, көнi лос.

Бара уялöны челядь,  
Гажөн тырöма ю дор.  
Бара вашкөдö тэн пеляд  
Мыйкө бурöс кызз пу кор.

*А. Мишарина*

 Лос — Васод, Вутшкось места, кёни быдмё эжөр турун.

 Казытышт гожся лунъяс йылысь. Лосьод нейджыд висьт да висьтав ёртыасыдлы.


## **1 §. Мөд классын велөдөмтор мөдпөвсталөм. Текст. Шыяс да шыпасьяс. Слог.**

**2 удж.** Лыдды. Юрнимав. Думышт мойдлы помсö.


Дзоридзалис меліник **пелысь** öти тулысö. Быттьö еджыд биён сійö öзйыны кутіс.

Ой, любö шонділы лои! Воддзаысь на **ёнджыка** төждысьны кутіс. Век шыльöдö пелысьсö зарни **югөрьяс-нас**. Көсйис сылысь еджыд **дзоридзьяссö** гөрдөн мавтны. И этадз матөдчылас, и тадзи. И вына асья югөрьясас вöйтлас пелысьсö, и лунтырөн öкмөм рытъя кыанас кояс. Но нинөм оз артмы.

*К. Сердитов серти*

 **Матөдчылас** — матыстчылас.

**Öкмөм** — чукөрмөм.

 1. Гиж торйөдөм кывъяссö, төдмав, кымын шы да шыпас быд кывйын.

2. Гөгөрвоод, мыйөн торъялöны кыв да сёрникузя. Кыдзи йитчöны кывъясыс сёрникузяын?

3. Гөгөрвоод, мыйөн торъялöны сёрникузя да текст. Кыдзи йитчöмаось мойдас сёрникузясыс?

Тулысын, меліник, өти, | Өти тулысö меліник пельсы  
дзоридзавны, пельсы. Еджыд, | кутіс дзоридзавны. Еджыд  
өзйыны, би, быттьö, сійö. | бион өзйис быттьö сійö.

4. Лыдды мойдлысь панассö (заводитчöмсö), шөр юкөнсö.

Висьт, кывбур, мойд — тайö текстъяс.

Текстлөн эм панас (заводитчөм), шөр юкөн, пом.


**Зудж.** Лыдды, висътав, позьö-ö текстсö шуны серамба-  
наөн. Мый артмөдö серамсö?

— Игö, чойыд гортад?

— Музыкальнöй школаын. Сэни велөдчö дуэтөн ворсны.

— Мый нö лоö «дуэтыс»?

— Чойöй öттшötш ворсö скрипкаөн да пианоөн.

 Гиж текстысь кык слога кывъяс. Инды гижöм кывъясысь  
гласнöйяссö да визьнит.

**4 удж.** Лыдды кывбурсö. Гиж колана шыпасъяс содталöмөн.

Ок, и з...рö, з...рö,

Шонд...а да зэр... .

Гожс... шонд... вöзй... ,

Ч...л...дъл...н с...н өзй... —

Чиктыл...н... , котрал...н... ,

Н...мкодъп...р...сь шуал...н... :

— Выль з...р ул...ын быдм...дчам,

Быдм...дчам да ёнм...дчам.

*Ю. Попова*



1. Кутшөм шыпасъяс да мыйла содтін?
2. Кымын гласнөй шыпас коми анбурын?

**5 удж.** Лыдды кывпесансö сорласьтөг.

Ярö Дөрöш гөрö йöрын,  
Кайö вөрö гөрöм бöрын,  
Вöрын дзөрö көрöм дөрöм.

*Г. Юшков*



1. Гиж слогъяс вылö юклöмөн.
2. Кутшөм шыяс паныдасьлöны медтшöкыда?

**\* 6 удж.** Лыдды нöдкывъяс да гиж вочакывъяссö.

1. Гыөрзылö, но оз кынмы,  
Садиттөг век ачыс быдмö...  
«С» кө содтан — лоö пуөн,  
«Б» кө — төлөн лэптö-нуö.  
«М» кө — звер-пöткэлөн эм,  
Новлöдлам тшöтш тэ и ме.

*Г. Горчаков*

2. «Ы»-өн öдйö журга-нуа,  
«О»-өн пызь ме пожнала,  
«У» кө пуктан — кынтала.

*Толя да Коля Игнатовъяс*




1. Мыйын төдчанлуныс сёрни шыяслөн?
2. Гиж небыд паратөм согласнөя кывъяссö.
3. Видлы ачыд лосьöдны татшөм сяма нöдкыв.



**7 удж.** Лыдды. Төдмав, көні нөдкыв, кывпесан, шусьөг, примета.

1. Яла ягысь<sup>1</sup> ёльö юны волö сюра йөра.
2. Арнад — купеч кодьöсь, тулыснад — корысь кодьöсь.
3. Көдзыд водзö кодзувъяс ворсöны.
4. Войдөрлун и төрыт вөлі,  
Талун эм, и аски лоö.  
Лоас гожöмын и төлын,—  
Шондیکөд тшөтш сійö волö.

 Бөрйы да гиж кывъяс куим столбикö, мед кывйын вөлісны: 1) сöмын чорыд согласнöй шыяс, 2) чорыд да небыд согласнöй шыяс, 3) сöмын небыд согласнöй шыяс.

**8 удж.** Гиж текстсö колана шыпасъяс содталөмөн. Гөгөрвоөд **и-і, е-э** шыпасъяслысь гижанногсö.

Пукала вөлі өтчид мырсянь неылын, шойчча. Виччысьтөг воис кай варыш. Кокъяс костас сылөн ичөт...к пыста. С...сся мыр дорын завод...тіс пысталысь нетшкыны гөнсö. А ме ог вөрзъы, окота лои видзөдны, мый лоö водзö.

Н...дыр ноксьыштөм бөрын л...бзис, сьөрсьыс нуис кыйдөссö. Ме водзö мөдөдчи. Кыл...с бокрысь ч...рзөм шы. Вөлөмкө, кай варышыд пиянсö вердö. Медым позсö некод оз казяв, куштысьö бокрын.

*В. Торопов серти*

## 9 удж. Лыдды кывбурсö.

### Узьны кад.

Пыр нин, ичöt пиöй,

Небыд вольпась пиö.

Мудзин: котралін лунтыр,—

Синмыд куньсяс пырысь-пыр.

Гажтöм вöt мед тэн оз усь,

Чöскыд унмön бура узь.

*С. Куликов*



1. Гиж кывъяс:

а) кöни эмöсь сöмын гортöм согласнöйяс;

б) кöни эмöсь сöмын гора согласнöйяс;

в) кöни эмöсь и гортöм, и гора согласнöйяс.

2. Вой кежлö йöз öта-мöдлы шуöны: «Бура узь!», «Чöскыд ун!», «Бур вой!» «Чöскыда узьны!» А мый шуöны йöз асывнас, луннас, рытнас? Кыдзи нöшта позьö чолöмасьны?

3. Гиж 3-4 чолöмасьна кыв да кывтэчас.

**10 удж.** Веж кывъясысь медводдза шысö, мед артмас выль кыв, гиж.

В ö ч т а д з и. *Нöш — кöш.*

Баля — ... , пас — ... , юр — ... , ном — ... , кар — ... , гöч — ... , гуг — ... .



Видлы рифмаön лöсьöдны кык визия кывбур.

**11 удж.** Висьтав, кутшöм согласнöйяс бöрын гижсьö *и* шыпас, мыйла? «Комиа-роча кывкудйысь» бöрйы да гиж *ди* да *зи* шыпасъяс вылö 10 кыв.

## 2 §. Кык [дз] шыа кывъяс.

**12 удж.** Лыдды кывъяссö. Эм-ö кутшöмкö торъялöм **дз** шыа кывъяссö лыддигөн?

Кыз — кыддза рас; лөдз — лөддза гожом; водз — воддза лун.

*ддз*

Кык [дз] шыа кывъяс гижсьöны тадзи:  
*аддзылі, лёддзён, виддзыс.*

**\* 13 удж.** Лыдды, гиж да визьнит кык **дз**-а кывсö. Тöдмав нөдкывсö.

Кык вок потшöс вомөн олöны да öта-мөдсö оз аддзыны.

**14 удж.** Гиж, визьнит кык **дз**-а кывъяссö.

Усис медводдза лым. Коля аддзис лымсö да кутис радлыны. Сийö котöртис ывлаö да соддзён босьтис лымсö.



Водзö мөвпышт да помав висьтсö.

**15 удж.** Артмөд сетом кывъясысь кык **дз**-а кывъяс.

Содз, видз, лөдз, кыз.



Лөсьöд кывтэчасьяс да гиж.

**16 удж.** Гиж сёрникузяссö мөд столбиксьыс лөсялана кывъяс содталөмөн.

Ю сайын ... туруна.

виддзыс

Турун ... кузь.

соддзөн

Вотөссö куралісны ... .

лөддзыс

**17 удж.** Артмөд сетөм кывъясысь сёрникузяс да гиж. Визьнит кык **дз**-а кывъяссö.

1. Ми, кыддза, вотчим, раскын. 2. Вөрись, быдсяма, аддзылім, вотөс. 3. Лөддза, гожөмыс, вөлі, таво.

**18 удж.** Гиж сёрникузяссö лөсялана кывъяс содталөмөн.

1. Видзьяс вылын туруныс куйліс (*кыдзи?*). 2. Дөрөм соскыс вөлі (*кытчөдз?*). 3. Повзьөмысла Ваня (*мый керис?*). 4. (*Мый?*) вөлі шылбыд.

О т с ö г в ы л ö к ы в ъ я с *виддзыс, гыррдзаөдз, лөддзөн, бөрддзис.*

**19 удж.** Юклы кывъяссö визьысь визьö вуджөдөм вылө.

Г и ж т а д з и.

*Ад-дза.*

Воддза, кыддза, гыррдза, лөддза, соддзөн.

### 3 §. Орччөн сулалысь кык өткөдь небыд согласнöя кывьяс.

20 удж. Лöсьöд серпасьяс серти сёрникузяс.



кильö

даддьöн

льддьö

ль

ссь

тть

ддь



1. Кутшöм өткөдь согласнöйясöс торйöдöма кывьяссьыс?
2. Мыйöн өткөдьöсь найö?
3. Кыдзи пасйыссьö небыдлуныс кык өткөдь согласнöйлөн?

Орччөн сулалысь кык өткөдь небыд согласнöя кывьясын  
ь гижсьö мöд согласнöй бöрас.

Гижсьö тадзи: *льддьö, быттьö, каттьö.*

**21удж.** Вочавидз 20-өд уджын сетөм серпасъяс сертиыс юалөмъяс вылө да гиж.

1. Мый вөчө ур?
2. Мыйөн ислалёны челядь?
3. Мый вөчө Надя?



Визьнит кык өткодь согласнөя кывъяссө.

**22 удж.** Мыссьё, вощьё, лыддьё кывъясөн лосьөд сёрникузяс да гиж.

**23удж.** Гиж. Содтав колана согласнөй шыпасъяс. Кутшөм согласнөйяс бөрын гижсьё э шыпас?

Пось ат...ьё тэныд, дона мам. Скөт карта вевт...ьёма шиферөн. Челядь кайёны кыр йылө, сэс...я исковтёны дад...бөн.



1. Визьнит кывъяс, көні орччөн сулалёны кык өткодь небыд согласнөй.
2. Висьтав, тані текст али торъя сёрникузяс. Мыйла?

**24удж.** Вочавидз юалөмъяс вылас, сёрникузяссө гиж.

Мый лои шоньд?

Кыдзи кывтө кер?

Мыйөн ислалёны челядь?

Мый вурис мам?

платтьё

даддьён

поводдя

молльён



Визьнит улітыс орччөн сулалысь кык өткодь небыд согласнөя кывъяссө.

**25 удж.** I. Юклы сетём кывъяссö визьысь визьö вуджödём вылö.

Г и ж т а д з и. *Плат-тьö.*

Платтьö, даддьön, поводдя, молльön, кысьсьö, мысьсьö.

II. Лыдды кывъяссö да орчöd.

воосьы

воосьö

вооссис

вооссяс

киссьы

киссьö

киссис

киссияс



1. Мыйла медводдза кывъясас **ь** гижсьö?

2. Мыйла бөръя кывъясас **ь** оз гижсьы?

Орчön сулалысь кык öткодъ небыд согласнöй бöрын и да я водзын **ь** оз гижсьы: *киллис — килляс, вевттис — вевттяс, каттис — каттяс.*

**26 удж.** Кывъяссö веж сідзи, мед **ь** эз ков гижны.

В ö ч т а д з и. *Дадъ — даддя.*


Бадъ, бедъ, киль, коль, чаль.



Юклы артмödём кывъяссö визьысь визьö вуджödём вылö да гиж.

**\* 27 удж.** Гиж комиön сетём роч кывъяссö.

Умываться, льётся, читает, спасибо, открывается.

 Кывъяссьыс визьнит орччөн сулалысь кык өткодь согласнойсö, висътав гижанногсö.

**28 удж.** Гиж сёрникузяссö, содтав колана шыпасъяс.

1. Первой лыдд...ы, а с...сса гиж. 2. Уръяс олöны кол...я вöрын. 3. Найö килл...öны пожöм да коз кольяс. 4. Чеччöм бöрын ме мыс...и да весал... пиньяс.

**29 удж.** Лыдды кывбурсö да висътав торйöдöм кывъяслысь гижанногсö.

### Тöвланьö.

Расъяс дзик нин пасътöм коли,

**Киссис** кызлөн кор...


Регыд, регыд мöдас усыны

Еджыд **килля** кор.

**Вевттяс** гөгөр шобдi пызьöн:

Видзьяс, муяс, вөр.

*Тима Вень*

-  1. Велöд кывбурсö, гиж юрвежсьыд.  
2. Гөгөрвоёд «*Вевттяс гөгөр шобдi пызьöн*» сёрникузя.

**30 удж.** Гиж торйöдöм кывъясссö. Визьнит орччөн сулалысь кык өткодь небыд согласнойсö да **ь** шыпас.

1. Водигөн Петя **мыссьö** кöдзыд ваён. 2. Миша **лыддьö** Юрий Гагарин йылысь книга. 3. Маша колльöдiс воксö детсадйö. 4. Тури вöчис кытш. Некымынысь горöдiс, **бытьö аттьöалис** челядьöс.



#### 4 §. Орччөн сулалысь кык разной небыд согласной кывьяс.

**31 удж.** Лыдды висьтсö, гөгөрвоод, мый тайö текст.

##### Войын.

Войнас Сенялön эз **узьсы**. Сийö зилис унмовсьны, но синьясыс эз **куньсьыны**. Трубаын **шутьялис** төв. Вöли шуштöм. Друг öшинь пыр **визьнитис** би югөр. Тайö батыс локтö машинаön. Батыс Сенялön врач. Сийö ветлис больничаö висьысь дорö.



1. Торйöдöм кывьяссьыс инды орччөн сулалысь согласнойяссö.

2. Кыдзи найö кылöны, небыда али чорыда?

тьль

льнь

зьсь

ньсь

Орччөн сулалысь кык разной небыд согласной костö гижсьö **ь**: *больнича, мельнича, шутьявны, узьсьö, узьсис.*

**32 удж.** «Войын» висьт серти лöсьöд план да гиж изложение.

**33 удж.** Гиж кывьяссö да визьнит орччөн сулалысь небыд согласнойяссö. Висьтав, кыдзи пасйöма налысь небыдлунсö.

Дзользисны, визьнит, куньсьыны, разьсис.



Лöсьöд тайö кывьяснас сёрникузяс.

**34 удж.** Лөсьөд серпас серти висът отсөг вылө сетөм кывъяс пыртөмөн.

Отсөг вылө кывъяс: дед, руч, додьсьыс, куньсьомаось, разьсис.



1. Бөрйы лөсьөдөм висътысь орччөн сулалысь небыд согласнойяса кывъяс да висътав налысь гижанногсö.

2. Кутшөм мойдкыв дорö лөсялө серпасыс?

**мысти**  
**вöлисти**

*Босьт төд вылад кывъяслысь гижанногсö,  
пырт аслад кывкудйö.*

**35 удж.** Гиж сёрникузяссö лөсялана кывъяс содталөмөн.

1. Лөнис лэбачьяслөн ... .

2. Жырйөс ыркөдөм бөрын чöскыда ... .

3. Здук ... классын лои чöv.


мысти

дзользьөм

узьсис

Визьнит орччөн сулалысь разной небыд согласнойяса кывъяссö, висътав гижанногсö.

## 5 §. Торйöдан ъ да ь пасьяс гижöм.



КОЗ

КОЗЪЯС

КЫДЗ

КЫДЗЪЯС



Лыдды кывъяссö. Висьтав:

1. Кутшöм шыпас гижöма **КОЗЪЯС** кывйын **-ЯС** водзвылын?
2. Кутшöм шыпас гижöма **КЫДЗЪЯС** кывйын **-ЯС** водзвылын?
3. Кутшöм шыпасьяс коми кывйын лоöны небыд шы петкöдлысьöн?
4. Мыйла колö **Ъ**?

**36 удж.** Лыдды кывъяссö да гөгөрвоöd, мыйла öти кывъясын **-ЯС** водзвылын гижöма **Ъ**, а мöдьясын — **Ь**.

*Чорыд согласнöйяс бöрын      Небыд согласнöйяс бöрын*

**Ъ**

козьяс

бобувьяс

синьяс

гагьяс

градьяс

гöпьяс

росьяс

тарьяс

**Ь**

кизьяс

кöчьяс

вöньяс

видзьяс

батьяс

мачьяс

пасьяс

лöдзьяс



1. Лосьод сёрникузяяс быд столбикысь öти кыв пыртöмөн.
2. Вöч кывкöртöд, кор гижсьöны **ь** да **ъ** пасьяс.

Чорыд согласнöйяс бöрын **-яс** водзвылын гижсьö **ъ**.  
 Небыд согласнöйяс **д', з', л', н', с', т', ч, дз** бöрын **-яс**  
 водзвылын гижсьö **ь**.

**37удж.** Сувтöд кывъяссö уна лыдö. Гиж найöс кык столбикö, кыдзи петкöдлöма улынджык.

Мöс, жонь, дзодзöг, пон, джыдж, порсь, юсь, кань.

*Лэбачьяс*

*Гортса пемöсьяс*

Сизь — сизьяс

Ыж — ыжьяс

**38удж.** Ворсыштам. Вайöд гозйөн **ь** да **ъ** пасьяса эмакывьяс.  
 В ö ч т а д з и. *Додьяс — бордьяс, юсьяс — сосьяс.*

**39удж.** Лыдды висьтсö, аддзы кывьяс, кöни эм торйöдан **ь** да **ъ**, гиж найöс.

Быд во öти и сийö жö кадö мян сикт весьтти лэбöны шоньд муясын тöвйысь лэбачьяс. Ме радейта видзöдны-колльöдны найöс ыли сьöкыд туйö.

Некөн на асьныс оз тыдавын, а шыыс налөн воö нин пельöдз. Сэссия тыдовтчöны и асьныс. Тайö лэбöны турияс. Юсьяс лэбöны зев выліті, муртса найöс аддзан синнад. Медся уліті лэбöны дзодзöгьяс<sup>1</sup>.

Тулысын найö бөр воöны мянö<sup>1</sup> поздысьны да быдтыны ассьыныс пияннысö.



1. Кутшөм лэбачьяс лэбёны төвйыны шоныдіньясө?
2. Текстлы сет юрним.

**40удж.** Думышт да гиж лэбачьяслысь да вөрса пемөсь-яслысь нель ним, мед кыв помын вөлі **ь**. Сувтөд кывъяссө уна лыдö.

**41удж.** Лыдды висьтсö да гиж. Содтав колана шыпасьяс.

### **Вöрын олысьяс.**

Вöрын олöны лэбач...яс: тар...яс, сьöлаяс, сиз...яс, көк...яс, сюз...яс.

Ув...яс вылö да бадь куст...ясö найö вöчалöны поз...яс, быдтöны пияннысö.

**42удж.** I. Гиж кывъяссö кык столбикö. Öтикас — кор **ь** лоö торйöдан пас, мөдас — **ь** петкөдлö согласнöйлысь небыдлун.

Мыськис, ручьяс, лöсьыд, кольяс, льöм, öшиньяс, пачьяс, куньса, бадь, дадьяс, кизьяс, вазьö, батьяс, платтьö.

Г и ж т а д з и. *Коньки | Бадьяс*

II. Лыдды да висьтав, кутшөм шыпасьяс сулалöны первой столбикса кывъясын **-яс** водзвылын, а кутшөм шыпас сулалö мөд столбикса кывъясын **-яс** водзвылын?

муяс	сойяс
керкаяс	дойяс
дїяс	войяс

**Гласнöйяс да й бöрын -яс** водзвылын торйöдан **ъ** да **ь** пасьяс оз гижсьыны.

**43 удж.** Гиж кывьяссö да висьтав, мыйла **-яс** водзвылас оз гижсьыны торйöдан **ъ** да **ь** пасьяс.

Льяс, ваяс, бияс, муяс, пуяс, черияс, кельчияс.

 Думышт сёрникузяс **бияс, черияс** кывьясөн.

**44 удж.** Гиж сетём кывьяссö коланаинö **ъ** пас сод-талёмөн.

Ёрт...яс, пу...яс, пи...ян, сё...ян, из...яс, вой...яс, шыр...яс, часі...яс, тасьті...яс, нывка...яс, кöза...яс, туй...яс.

**45 удж.** Лыдды висьтсö, висьтав гижанногсö торйöдём кывьясыслысь, гиж найöс.

### **Быдмöны мича пуяс.**

Вөрöд ветлігөн веж **козьяс** да **пожöмьяс** пövстысь сёр арын аддзывлан лыстём пуяс. Чайтан, мый найö косьмö-маöсь. Но збыльысьсö<sup>1</sup> найö **ловьяöсь**. Сöмын **лысьяссö** шыбитöмаöсь төв кежлö. А видзöдлöй на вылö тулысын, кутшöм мичаа вöччöны веж **лысьяснас**.


Тайö нияс. Ниа пуяссö позьö аддзыны и öшинь увьясысь. Ниа быдмö 30—50 метр джудждаöдз. Сійö олö 300—500 воöдз. Пуыс дуб кодь жö ён.

- ?** 1. Кутшөм пуяс төв кежлө шыбитöны корсö?  
 2. Лöсялö-ö нимыс текст сюрöсыслы? Бөрйы бурджык юрним.  
 3. Корсь юалöмъяс вылö воча кывъяс, сэссия гиж.  
 1) Дыр-ö олö ниа пу?  
 2) Кутшөм сийö сёр арын?

**46 удж.** Лыдды сетөм кывъяссö да гиж уна лыдын.

Г и ж т а д з и: *пу — пуяс.*

1. Ю, шор, ты, ёль, саридз.
2. Сикт, кар, посёлок, грезд.
3. Карандаш, линейка, ручка.

-  1. Кутшөм кывйөн позьö öтвывтны сетөм кыв чукөръяссö?  
 2. Висьтав **-яс** водзвылын торйöдан **ъ да ь** пасьяс гижан правилö, вайöд сы дорö уджысь став кывсö.

**47 удж.** Гиж **ъ да ь** пасьяс коланаинö содталөмөн.

### Ар да Гожөм.

Паныдасисны вöрын Ар да Гожөм. Ёна лоисны радöсь. Öд быдса во эз аддзысьлыны. Сёрнитисны да сёрнитисны, Ар и шуö:

— Гожөм, отсав меным кыз...яслысь, пипу...яслысь, бад...яслысь, ниа...яслысь платтьöнысö да звер...яслысь пас...яснысö вежны.

— Ог вермы, ёртöй,— шуис Гожөм да прöщайтчис Аркөд.

- ?** Мыйла Гожөм оз вермы отсавны Арлы? Кызди тайöс колö гөгөрвоны?

**48 удж.** Мөвпышт да гиж кывъяссö куим столбикö.

Ъ                      Ъ                      —

Г и ж т а д з и. *Дзодзöгьяс Юсьяс Турияс.*

В и с ь т а в:


1. Кор кывъясын -яс водзын гижсьö **Ъ** пас?
2. Кор кывъясын -яс водзын гижсьö **Ь** пас?
3. Кор -яс водзын ни **Ъ**, ни **Ь** пасьяс оз ков гижны?

### **6 §. Торйöдан Ъ да Ъ пасьяса кывъяс визьысь визьö вуджöдöм.**

**49 удж.** Лыдды кывъяссö. Кутшöм шыпасьяс гижöма -яс водзылас? Мыйла?

Бордьяс, нопьяс, пуртъяс, көртьяс.

Видзьяс, ручьяс, низьяс, кольяс.

 Юклы кывъяссö слогьяс вылö, медым позис вуджöдны визьысь визьö.

Г и ж т а д з и. *Бордъ-яс, Видзь-яс.*

Визьысь визьö кывъяс вуджöдигөн торйöдан **Ъ** да **Ь** пасьяс оз торйöдсыны воддза согласнöйясысь.

**Вуджöдны колö тадзи: *садъ-яс, пачъ-яс, чунъ-яс.***

**50 удж.** Лыдды. Юклы торйöдöм кывъяссö визьысь визьö вуджöдöм вылö да гиж.



## Ёг турун бырөдөм.

Град йөрысь **ёг турунсө** колө нетшкыны вужнас. Найөс колө нетшкыны **көйдыс** вөтөдз на. Ёг турунсө кө колян град йөрө, сылөн **көйдысыс** разалас град йөр пасьта.

Ёг турун вылө овмөдчөны **гагьяс** да тэчөны **колькьяссө**. Колькьяссыс петөны **номырьяс**. Найө сөйөны **пуктасьяссө**.

**51 удж.** Лөсьөд 50-өд удж серти воча кывьяс да гиж.

1. Кодьяс сөйөны град выв пуктасьяс?
2. Көні найө рөдмөны?
3. Кыдзи колө бырөдны ёг турунсө?

**?** Инды текстысь удж вөчны велөдөм (инструкция) да лыдды.

**52 удж.** Лыдды. Торйөдан **ь** паса кывьяссө юклы слогьяс вылө сідзи, мед позис вуджөдны мөд визьө. Гиж.

1. Быд асыв да быд рыт сөйөм бөрын весав пиньяс.
2. Пиньяснад эн жуглы өрешки да мукөд чорыдторьяс.
3. Эн чутөд пинь да аньяс емөн да мукөд ёсьторьясөн.
4. Быд во кыкысь петкөдлы пиньястө врачлы.
5. Ас кадө бурдөд висьмөм пиньястө врач дорын.
6. Ичөтсянь видз пиньястө сөстөмөн да мичаён


Г и ж т а д з и. *Пинь-яс, ...*

- ?**
1. Кут вежөрад сетөм индөдьяссө да ов на серти.
  2. Мыйла колөны индөдьяс? Кутшөм индөдьяс тэ төдан нин?
  3. Лөсьөд да гиж индөд тасьті-пань сөстөма видзөм йылысь.



**53удж.** Лосьод серпасъяс серти висът, юрнимав да гиж.


Отсөг вылө кывъяс: *тулысын, пуяс, коръяс, лэбачьяс, позъяс, град выв пуктасъяс, дөзьөритны, небзьөдны.*

 1. Гижом висътсыд юклы визъысь визьё вуджөдөм вылө торйөдан **ъ да ь** пасъяса кывъяссө.

**54удж.** Лыдды сёрникузяссө пасъяссө пыдди пуктөмөн, коставлөмөн.

А кутшөм лосьыд | асылын мунны вөрті! || Сынөдыс | ыркыд, | сөстөм, | неуна өвтыштө | сир дукөн. || Кок улад водёны | **пуяслөн** кузь **вуджөръясыс**<sup>1</sup>. ||

Гөгөр чөв. || Сөмын и кылёны | **лэбачьяслөн** мича **ссылөм** | да **сизьяслөн** тотшкөдчөм шыыс. ||

 1. Подулав торйөдөм кывъяслысь гижанногсө правилө-ясөн.

2. Гиж текстсө мичаа, торксытөг.

**55 удж.** Лыдды. Корсь ъ паса кывъяссö да висътав гижанногсö.

Тайö лоис тулыснас. Пес вöлі кералам чойкöд. Зэв ёна мудзим. Кöсья вöлі бокö воськовтны. Но друг видзöдлі муас да кынми места вылö: кок дінын руд лэбач лажынътчöма, некыт оз вөрззы, быттьö некодös оз аддзы ни оз кыв. Гöрд дора синъяссö лазгöдыштöма, оз весиг лапнит. Гön серъясыс нитш да кос коръясыс кодъöсь жö. Вөлöмкö, контар тані пöжö колькъяссö.

Некымын лун мысти тайö местаас контарыд эз нин вöv. Кольöма сöмын кольк кышъяс. Лыдди: вит петöма.

*В. Торопов серти*

? 1. Мыйла пес кералысьяс дыр эз казьявны контарös? Вочавидз текстысь аддзöм сёрникузясөн да гиж найös.

2. Инды висътлысь заводитчöмсö, шөр юкөнсö, помсö. Юрнимав юкөнъяссö.

## *7 §. Кыв тэчас. Кыввуж.*


**56 удж.** Лыдды, сэсся гиж тöдчöдöм кывъяссö да визънит налысь öткодъ юкөнсö.

### **Миян сикт.**


Миян **сикт** сулалö ю дорын. **Сиктын** эм кык судта школа. Школасянь неылын — клуб. Клубын гажöдчöны **сиктса** том йöз. Туй бокас быдмöны кыз пуяс. Керка öшинь увъясас йöз чередитöны мича дзоридзьяс, быдтöны град выв пуктасьяс, картофель, вöдитöны вотöса кустарникъяс.


*Сикт*, *сиктса* кывъяслөн эм өткодъ юкөн. Тайö кыввуж:  
*сикт*.

**Кыввуж** — кывлысь медтöдчана вежörtас петкöдлысь юкөн.

**57 удж.** Гиж өткодъ кыввужъя кывъяссö да петкöдлы кыввужсö тадзи:  .

Шувгö вөр. Вöралысь мунö звер кок туй кузя. Тавося ар озыр вöрса пöткаөн.

 Мыйла сёрникузяяс помас сувтöдöма чут?

**58 удж.** Гиж өткодъ кыввужйысь артмём кывъяссö торъя столбикъясö. Петкöдлы кыввужсö  .

Мун. Кар. Тöv. Удж. Мунанin. Уджавны. Карса. Тövбыд. Мунышт. Кардорса. Уджвывса. Тövся.

**\* 59 удж.** Гиж кывъяссö да быд чукöрысь визьнит лöсвятöмсö. Быд кывлысь пасйы кыввужсö.

1. Вöраин, вөрöшитны, вөр, вöрса.
2. Арся, аръявыв, арбыд, арös.
3. Вочöжся, волыны, вобыд, во.
4. Войбыд, вой, войвывса, войысь войö.
5. Джодж, джоджъяс, джодждöра, джоджалöны.
6. Ю, ютор, юсайса, юяс.

**60 удж.** Инды кыввужъяссö чукöрын сетöм кывъяслысь.

Ныв — ныланöй — нылыд; вöв — вöла-доддя — вöлөн;  
сыв —сылöмин — сылыштöма; гөгөр — гөгралім — гөгөрбок;  
гöтыр — гөтрасис — гöтыра; чуқыр — чукрасьöма — чуқы-  
ра; гудыр — гудралі — гудыртчыны.

В ö ч т а д з и. *Ныв* — *ныланöй*, *гөгөр* — *гөгралім*.

Кыввужйын паныдасьлö

в да л шыяслön вежсьöм: *сов* — *сола*, *зэвтны* —  
*зэлöдны*;

кывъяслön мöд слогын ö, ы шыяслön усьöм: *чукыль* —  
*чукля*, *чепöль* — *чеплясьны*.

## **8 §. Суффиксьяс.** **Кыв вежлалан суффиксьяс.**

**61 удж.** Лöсьöд сетöм кывъясысь сёрникузяяс. Висьтав,  
кызди вежсисны торйöдöм кывъясыс.

1. Мам, **агроном**, уджалö. 2. Мам, **быдтыны**, пуктасьяс,  
град, выв. 3. Ме, **ветлыны**, мам, отсасьны. 4. **Мам**, сьöкыд,  
уджыс.



1. Кызди шусьö кывлön медтöдчана юкöныс?


2. Торйöд индöм кывъясысь кыввуж бöрын сулалысь  
юкөнсö.

3. Кутшöм тöдчанлуныс кыв вежлалан юкөнлөн?

**Суффикс** — кыввуж бөрын сулалысь кыв юкөн.






Эмось **кыв вежлалан** суффиксьяс: *мун — мунö, мунöны;*

**виль кыв артмöдысь** суффиксьяс: *удж — уджач, уджтор.*

**62 удж.** Гиж кывтэчасьясысь **вөр-** кыввужъя кывъяссö да торйöд кыв вежлалан суффиксьяссö: .

— Арся вөр. Вөрлөн шувгём. Вöрын олысьяс. Вöрысь локтысьяс. Вөрöд ветлысьяс.

Кыв вежлалан юкөн шусьö **кыв вежлалан суффиксөн.**

Сёрникузяын кывъяс йитчöны **кыв вежлалан суффиксьяс** отсöгөн: *мам, мам, быдт, ветл, босьт.*

Кыв вежлаланаөн лоöны **-яс, -ян, -ны** уна лыд петкöдлысь суффиксьяс: *керкаяс, пиян, мунöны.*

**63 удж.** Гиж текстсö. Кывъяссö йитлы колана кыв вежлалан суффиксьясөн.

И гожöмын, и ар... ,

И төл... , и көть кор —

Быд сикт... и быд кар...

Зиль удж... юргö гор.

*М. Лебедев*


**64 удж.** Лыдды, юрнимав. Гиж торйöдём кывъяссö, инды налысь кыввужсö да кыв вежлалан суффиксьяссö.

Чери — зэв чөскыд да радейтана сёянтор коми йöзлөн. Черитö и **солалöны**, и **пуöны**, и косьтöны, и **пöжалöны**. Важөн быд праздник кежлö пöжавлісны черинянь, сьтöг праздник пызан вöлі голь. Косьтöм да сола чери вöлі кослунъя **сёянөн**.

**65удж.** Артмөд сетөм кывъясысь сёрникузяс да лосьод ар йылысь висьт.

1. Ар, бара, **матыстчыны**. 2. Шонді, сайö, **дзевсьыны**, кымөръяс. 3. **Дугдыны**, таръяс, кургыны. 4. Чöv, **овны**, сьöлаяс. 5. Оз, нин, горзöмыс, öшинь, **челядь**, кыв, улын.

Г и ж т а д з и. *Бара матыстчис ар.*

 Инды кыв вежлалан суффиксьяссö торйөдöм кывъясысь.

**66удж.** Думышт да гиж висьт сетөм кывъяссö пыртөмөн. Кывъясысь инды кыв вежлалан суффиксьяссö.

Тшак, вөр, лэбач, вотös, пу, чуман.

**67удж.** Лыдды, а сэсса гиж. Инды торйөдöм кывъясысь кыввужсö да кыв вежлалан суффикссö.

Зарни шонді асыввывсянь **петіс**,

**Вөрлы-валы** мелілунсö **сетіс**.

Эжва весьтын пышкай тивзö-**сьылö**,

Сылөн сьылөм ылö-ылö **кылö**.

*Л. Мартюшева*

## 9 §. Виль кыв артмодысь суффиксьяс.

**68 удж.** I. Инды кыввужсö сетöм кывъясысь.

Гиж, гижысь, гижöд, гижöм.



1. Висьтав, кывлön кутшöм юкön шусьö кыввужйöн.
2. Кывъясысь инды кыввуж бöрас сулалысь юкөнъяссö.

II. Лыдды.

Гиж  $\left\{ \begin{array}{l} \text{öд} \\ \text{ысь} \\ \text{öм} \end{array} \right\}$  — суффиксьяс



Висьтав, кызди **гиж** кывйысь артмисны виль кывъяс да мый найö петкöдлöны.

Гиж (*мый вöч?*). Гижöд (*мый?*). Гижысь (*кодi?*). Гижан тетрадь (*кутшöм тетрадь?*).

Öти кывйысь виль вежöртаса кывъяс артмöны **кыв артмодысь суффиксьяс** отсöгön:

бур → бур<sup>а</sup>, бур<sup>ор</sup>

**69 удж.** Инды кывъясысь кыввужсö, кыв вежлалан да кыв артмодан суффикссö. Висьтав, кöни сулалö кыв артмодан суффиксыс.



Г и ж т а д з и. *Лөниң*

Гижыськөд, вотосла, пуктас, пасйөд.

**70 удж.** Артмөд суффиксыас отсөгөн выль кывъяс.

Гаж, вот, мун, мич, кар.

Суффиксыас: *-ös, -ся, -ысь, -öd, -а, -са.*

Г и ж т а д з и. *Гажа*

Кыв артмөданаөн жө лооны меліалан да ичөтмөдан вежөртас артмөдысь суффиксыас **-ук, -иль, -ник, -іник, -ка, -ов:** нылук, ручиль, мичаник, косіник, зонка, гөрдов.

**71 удж.** Гиж кывъяссө да инды кыв артмөдан суффиксыассө.

Нывка, пиук, ичөтик, рудов, мичаник, көчиль.

 Лөсьөд сёрникузяяс **пиук** да **көчиль** кывъяс пыртөмөн.

**72 удж.** Лыдды. Гиж торйөдөм кывъяссө да инды сэтысь кыв юкөнъяссө.

Өшинь улын быдмис **ичөтик** сад. Сэтчө петіс Аля нима **нывка**. Сійө босьтіс киас **няньтор** да петкөдіс **кроликлы**. Кролик оліс пөвъясысь вөчөм клеткаын. Мамыс тшөктіс **нывкалы** вердны **кроликөс**. Кролик радейтіс ворсны **кысуккөд**.

Г и ж т а д з и.

кыввуж	кыв артмөдысь	кыв вежлалан
	суффикс	суффикс
<i>кыс</i>	<i>-ук</i>	<i>-көд</i>
<i>ичöt</i>	<i>-ик</i>	

**73 удж.** Гиж и либö и шыпасъяс содталөмөн. Торйөдөм кывъясысь инды кыввужсö да кыв артмөдысь суффикссö.

Вөл... көдзыд асыв. **Сера** кымөръяс костөд мыччас...с **блед...ник** шонд... . Чукөрөн-чукөрөн сулал...сны еджыд **кудриа** кыдзяс, вес...г оз **вөрзъыштны**.



Кутшөм согласнöйяс бöрын гижсьöны и да и шыпасъяс?

**74 удж.** Сетөм кывтэчасъясөн думышт сёрникузяс да гиж. Торйөдөм кывъясысь инды кыв артмөдан суффикссö, висътав сылысь вежörtассö.

**Гажа** серам. **Зэра** кымөр. **Вöрса** пötка. **Ичötик** чери. **Гожся** рытö.

Г и ж т а д з и. *Гажа* серам ...

**75 удж.** Лыдды. Лöсьöд быд сёрникузя дорö юалөм, вочавидз, сэсся висътав небöгö видзöдтөг.

**Нывкалөн висът.**

Менам мам быдтор кужö вöчны. Тöрыт сэтшөм **мича** партук меным вурис. А талун зэв чöскыд шаньга пöжалис.

Водз асылын мам мунö **гортысь**. Сійö идрасьö **картаын**.  
Тані куканьясöс видзö. Школа бöрын ме ветывла жö картаас.  
Отсая **мамлы**. Весала юан дозьяссö.

Мам — бур **уджалысь**. Сійöс век ошкöны. Газетын сы  
йылысь гижисны.

*Г. Юшков серти*

**76 удж.** «Нывкалön висът» серти гиж изложение.

П л а н.

1. Менам мам.
2. Мам — кук видзысь.
3. Отсая мамлы.
4. Мам — бур уджалысь.

**77 удж.** Артмöд предмет петкöдлысь кивъясысь признак  
(тöдмöс) петкöдлысь кивъяс, мед суффиксыс индiс, мый  
признакыс мöд предметас абу. Пасйы суффикссö.

В ö ч т а д з и. *Сакартöм чай.*

1. Сакар (чай). 2. Вый (рок). 3. Чышъян (нывка). 4. Потшöс  
(зорöд). 5. Би (керка).

**78 удж.** Артмöд сетöм кивъясысь виль кивъяс.

1. **-а (-я)** суффикс отсöгөн.

Пась, öчки, ноп, чышъян, лыжи.

2. **-öсь** суффикс отсöгөн.

Ном, геб, гут, бус, са, няйт, пызь.



Лöсьöд кивтэчасьяс артмöм кивъяснас.

**79 удж.** Артмөд кывъясысь кыв артмөдан суффиксяс отсөгөн выль кывъяс.

Шонді. Гиж. Вөр. Мича. Вур. Потш. Төв

Суффиксяс: *-ös, -ся, -а, -ник, -öd, -са, -ыс.*

Действие петкөдлысь кывъяс артмөны предмет да признак петкөдлысь кывъясысь **-ав, -ал(-ял), -ась, -öd, -ышт** суффиксяс отсөгөн: *пань — панялө, панясьö, паньöдö, паньыштö; кöдзыд — кöдзалө, кöдздöдiс, кöдзальыштiс.*

**\* 80 удж.** Корсь кывсö кывлөн юкөнъяс серти.

1. Кыввужйыс ( — ) — *Ватор* кывйын,  
кыв артмөдан суффикс ( ^ ) — *сиктса* кывйын,  
кыв вежлалан суффикс ( □ ) — *Вөр* кывйын  
Корсян кыв: *Васа*


2. — гым  
^ жугалис  
□ зэрö

3. — сола  
^ кымрасьö  
□ тэчö


4. — тшака  
^ ручка  
□ турунла


5.  батылы

 гут

 воклөн

6.  пыс

 уджалё

 муні


7.  ёртлы

 ном

 батыкөд

8.  сёйё

 люкыштас

 босьта

### 81 удж. I. Төдан-ө тэ правилёяс?

1. Висьтав, кутшөм юкөнъяс вермёны лоны кывйын.

2. Кутшөм юкөн на пысь медтөдчана?

3. Кутшөм юкөн отсөгөн кывьяс йитчёны өта-мөдыскөд?

4. Кутшөм юкөн отсөгөн артмёны выль кывьяс?

II. Гиж. Инды кыв юкөнъяс төдчөдөм кывьясысь.

1. **Гожся** луныд во чөж вердө. 2. **Биён** эн ворс — сотчан. 3. **Уджтөг** мортө он во.

**?** Гөгөрвоод, көні шусьөг, а көні өлөдөм.

**82 удж.** Артмөд действие петкөдлысь кывъясысь предмет петкөдлысь кывъяс, мед артмис мортлөн ним, кодї вöчö тайö уджсö. Предмет петкөдлысь кывлысь инды суффикссö.

Ворсны — ..., велöдчыны — ..., ытшкыны — ..., вузасыны — ..., вуджöдчыны — ..., юр кыскавны — ..., пöжасыны — ... .

В ö ч т а д з и. *Ворсны — ворсысь.*

**83 удж.** Видлав сетöм кывъяссö кывлөн тэчас серти да гиж таблицаö.

Пармаса, юкмöсö, сэтöрыс, кöчпиöс, сиктсалөн.

	Кыв артмöдысь суффикс	Кыв вежлалан суффикс
вöр	—	-ын
...		

**84 удж.** Лöсьöд кыв артмöдан суффиксыяс отсöгөн выль кывъяс.

1. Сов. 2. Шыдöс. 3. Кöм.

В ö ч т а д з и. Кизь  $\begin{matrix} \nearrow \text{киз-я} \\ \rightarrow \text{кизь-тöм} \\ \searrow \text{киз-яв} \end{matrix}$

## Төдөмлун вынсьөдөм вылө уджъяс.

**85 удж.** Гиж вочавидзём «Мыйла Сыктывкар тадзи шусь?» юалөм вылө.

**\* 86 удж.** Кутшөм кыв гоз лөсявтөм кыв тэчас боксянь?

1. Чунь — гыж, вужъяс — коръяс, мөслы — мөслань, югыд — вокыд.

2. Мунө — нуө, серам — видзам, йөкта — пета, усис — йирис.

3. Гижа — гажа, лёка — бура, сарапана — чышъяна, лэба — йөтка.

**87 удж.** Лыдды да гөгөрвоөд, кутшөм признак серти артмөмаось татшөм нимъясыс?

Вижьюр, урбөж, визяорда, герчкан (лэбач), Борган (шор), потшөс, вабергач.

**88 удж.** Видлав сетөм кывъяссө тэчас серти. Лөсьөд кывъяссө пыртөмөн сёрникузяяс.

Пасйөд, сэтөра, төвся, кортөм, төлыся.

## 10 §. Кывсикасьяс.



1. Висьтав предмет нимъяс.

**Коді?** Кага, ...

**Мый?** Пыж, ...

2. Висьтав действие нимъяс.

**Мый керö?** **Мый вöчö?** Кывтö, ...

3. Висьтав признак нимъяс.

**Кутшöм?** Ыджыд, ...

Предмет ним — **эмакыв.**

Действие ним — **кадакыв.**

Признак ним — **кывберд.**

*Ме, тэ, сійö, ми, ті, найö* — **нимвежтасьяс.**

*Ю дорын, сикт весьтын* — **кывбöрьяс.**

Эмакывъяс, кадакывъяс, кывбердъяс, нимвежтасьяс, кыв-  
бöрьяс — **тайö кывсикасьяс.**

**89 удж.** Лыдды кывъяссö да гиж кывсикасьяс вылö торйöдöмön.

Лым, ворсö, шоныд, зэр, аддзö, лыжник, ислалö, лэчыд, пукалö, гора, кыйсьысь, ыджыд.

Г и ж т а д з и.

Эмакывъяс: (*коді?*) *нывка*, ... (*мый?*) *шонді*, ...


Кадакывъяс: (*мый керö?*) *шонтö*, ...

Кывбердъяс: (*кутшöм?*) *югыд*, ...



**90 удж.** Лыдды да өти столбикö гиж эмакывъяс, мөдö — кывбердъяс, коймөдö — кывбөръяс.

Туй бокин стен моз сулалисны джуджыд пожомъяс да козъяс. На пөвстын вуджрасисны арся<sup>2</sup> виж да гөрд паськөма кызъяс<sup>2</sup> да пипуяс. Пуксис рыт. Пемыдыс сукмис, вевттис вöрсö.

 Висьтав **-яс** водзвылын **ъ** либö **ь** гижан правилö.

**91 удж.** Лыдды кывбурсö. Торйөдöм кывъясысь инды кыввужсö да кыв вежлалан суффикссö. Гиж эмакывъяссö.

### **Төвся турөб войö.**

Пемыд. Көдзид. Лымйөн тыртö.

Ывла вылын ыджыд төв.

Лымсö посводзъясö **пыртö.**

Помся камгö өдзöс пөв.

Оз и ланьтлы, төв пыр өддзö:

Керка вылысь нетшкö тьöс;

Лымсö **гартö, нуö** водзö,

Кисьтис, **кылö**, чипас пес.

*А. Пушкин серти*



1. Висьтав, кутшөм кывъясөн петкөдлөма турөбсö.
2. Велөд кывбурсö.
3. Гиж кывбурсö память сертиыд.

## 11 §. Эмакыв.

Эмакыв — тайё предмет петкөдлысь кыв. Эмакывъяс вочавидзёны **кодi?мый?** юалёмъяс вылө: *велөдчысь, кань, быдмөг, пув, керка.*

**92 удж.** Содтав лөсялана эмакывъяс.

1. Гут-гаг: гут, ...
2. Дзоридзьяс: катшасин, ...
3. Лэбачьяс: сырчик, ...
4. Гортса пемөсьяс: вөв, ...
5. Йөз: плөтник, ...

**93 удж.** Гиж **кодi?** да **мый?** юалёмъяс вылө вочавидзысь эмакывъяссө торйөдөмөн.

Вөр, вок, кер, лым, вөралысь, град, ёрт, чаг, пес, чань, керка, мастер, чери, столяр, банка, керасьысь.

Г и ж т а д з и. *Кодi? Ёрт, ... Мый? Лым, ...*

**\* 94 удж.** Инды быд кыв чукөрысь лөсявтөм кыв. Гөгөрвоод бөрйөмтө.

1. Кыдз, бадь, коз, пелысь.
2. Тупөсь, черинянь, юква, шаньга.
3. Шор, ты, ёль, ю.
4. Кага, пөль, зон, купеч.
5. Вурсьысь, бать, кылөдчысь, вузасьысь.

6. Платтё, сарапан, форма, майка.

7. Тшөка, юрси, тош, ус.

**95 удж.** Гиж эмакывъяссö татшöм чукөръясö: йöз, гортса пемöсьяс, пöткаяс, черияс, кöлуй.

Бать, дозмөр, вöв, гыч, пон, сир, чипан, мös, тетрадь, эшкын, пызан, томан, кузнеч, тар, сьöла, налим, ыж, нывка, ручка, шойччысь.



Гиж кывкудъяд **шойччысь** кыв.

**96 удж.** Лöсьöд куим сёрникузя **поход, челядь, вөр** кывъяс пыртöмön да гиж. Гижöм сёрникузясысь визьнит эмакывъяссö.

**97 удж.** Лыдды текстö да висътав сюрöссö. Торйöдöм кывъяс дорö сувтöдав куалöмъяс да висътав, кутшöм кывси-касъясön найö лоöны.

### Ош.

Арнас **ош** пырис тшöкыд коз улö. Сэтчö сийö кодйис **гу**, ваялис **лыс**<sup>5</sup>. Вылысас шыблалис **ньөр**<sup>5</sup> **чукөр**. Пырис ош гуас да водис.

Тöлын усис джуджыд **лым**. Частö шутлялис **вой төв**. А ошкыд вугралис төвбыд.

Тулыснас сийö петис гуысь да мунис сёян корсыны.

*В. Юхнин*



1. Быд юкön лыдды торйön, юрнимав.
2. План серти гиж изложение.



**98 удж.** Лосьод да гиж серпас серти мойд морт-морткод сёрни пыртёмон. Сёрникузяясысь визьнит эмакывъяссö.

**99 удж.** Гиж паныд вежортаса эмакывъяс тадзи:

**асыв — рыт.**

Асыв. Тöv. Гожöм. Рыт. Ар. Вой. Тулыс. Лун.



Гиж нель-вит шусьог, көни эмось тайö эмакывъясыс.

## 100 удж. Лыдды.

Толялөн мамыс конюкалө. Сійө пыр доддявлө Лысан нима вөлөс. Гөрдов гөныс волялө бокъясас и мышку вылас, кок помъясыс еджыдось. Кымөс вивсянныс ныр йылөдзыс еджыд визь жө. Та вөсна и Лысан. Толя быд лун конюшня-ын. Мамыслы отсалө урокъяс бөрын. Найө отлаын разөдөны вөв кок ув. Зонка пырджык манитчө Лысан дорын: шыльөдө гөгөрбок, бусысь да гөнъясысь весалө. Вөвлы долыд, юрнас ниртчө зонкалы пельпомас.

*В. Торопов*

**?** 1. Юклы текстсө юкөнъяс вылө да быд юкөн гиж гөрд строкасянь.

2. Визьнит ловья лов петкөдлысь эмакывъяс, сувтөд на дорө юалөмъяс.

## 12 §. Эмакывлөн лыд.

**101 удж.** Лыдды. Висьтав, мыйөн торъялөны первой да мөд столбикса эмакывъясыс.

### Öтка лыд

лэбач

нывка

пу

кодзув

### Уна лыд

лэбачьяс

нывкаяс

пуяс

кодзувьяс



1. Мый петкөдлө öтка лыда эмакыв?

2. Мый петкөдлө уна лыда эмакыв?

Эмакывъяс овлöны **öтка** да **уна лыдын**. Öтка лыда эмакыв петкöдлö öти предмет, а уна лыда эмакыв — кык либö некымын предмет.

**102 удж.** Гиж. Öтка лыда эмакывъяссö визьнит öти визьön, уна лыдасö — кыкön.

Киын ем да тшöтш и сунис,  
Каньлы кöсья вурны тюни,  
Лэчyd гыжйыс мед оз кынмы,  
Гашкö, шыръяс кутас кыйны.

*Н. Куратова*

**103 удж.** Лыдды текстсö да гиж сэтысь торйöдöм эмакывъяссö уна лыдö сувтöдöмön.

Печора ю нуö Войвыв саридзö уна ва. Сэни олö быд сикас **чери**. Ълöдз славитчö печораса **сьöмга, ком, кебöс**. Сэтчöс вөръясын олöны **йöра, көр, ош, кынь, тулан, ур, дозмөр, сьöла, байдög**.

Эмакывъясслысь уна лыдсö петкöдлö кыв вежлалан суффикс **-яс**: *ур — ур<sup>я</sup>я, йöра — йöр<sup>я</sup>я*.



Кутшöм правилöяс колö тöдны кывсö уна лыдын гижигön?

**104 удж.** Сувтöд öткa лыдa эмакывъяссö уна лыдын;  
-яc суффикс водзвылас, кытчö колö, гиж торйöдан **ь** либö **ь**.

Дадь, мач, кыдз, öшинь.

Кар, коз, берег, сикт.

Вой, би, ки, книга, пипу.



Гöгöрвоöд гижанногсö правилöяс отсöгөн.

М ö в п а в т а д з и: *Дадьяс* кывйын -яc водзын  
согласнöйыс небыд, сы вöсна гижам **ь**.

### **105 удж.** Лыдды.

Дань тадзи шусьö Кöрткерöс районса öти сикт сийö пу-  
калö Лöкчим шуйга бокин сиктсö нимтöма медводдза олысь  
Даниил Забоев серти сийö татчö волöма Сыктывкар бердса  
Кöтшпонысь тайö грездас медся ёна паныдасьлö Забоев ов.

*А. Туркин*



1. Мыйла тайö гижöдсьыс сьöкыд гöгöрвоны висьталан-  
торсö?

2. Гиж текстсö колана пунктуация пасьяс тэчöмөн. Кыдзи  
тэ нимтан сийöс?

3. Аддзы да визьнит эмакывъяссö.


4. Лöсьöд да гиж татшöм жö тэчаса текст кутшöмкö  
места йылысь. Гöгöрвоöд ним вежöртассö.

### 13 §. Эмакывлөн вежлөг.

**106 удж.** Лыдды. Торйөдөм эмакывъяс дорас сувтөд юалөмъяс да инды кыв вежлалан суффиксъяссө.

**Понпи** вөлі ыджыд юра, вөсни кокъяса. **Понпилөн** гөныс не то рыжөй, не то руд, а синмыс вералис виж рөмөн. Челядь радейтисны ворсны **понпикөд**. Вой кежлас **понпиөс** йөртлісны кильчө пос улас, вайлісны **понпилы** йөв да нянь.

*С. Раевский серти*

Мукөд кывъяскөд йитчөм могысь эмакывъяс вежласьёны. Найө босьтөны уна сикас кыв вежлалан суффиксъяс: **-лөн, -лысь, -лы** да мукөд. Петкөдлысьёны  пасөн.

**107 удж.** Гиж. Торйөдөм эмакывъяслысь инды кыв вежлалан суффиксъяссө.

Ме лэпти **ёкышөс** да **сирпиөс**. А **Генялөн** оз арты кыйсьөмыс. Ветлөдлө ва дортис да повзьөдлө **чериясөс**. Черияс **береглянь** ызмунласны либө бөрвыв чепөсийоны. **Геняөн** повзьөдомаыс и крукасис менам **вугырө<sup>3</sup>**.

*А. Одинцов серти*

**108 удж.** Содтав торйөдөм кыв дорө кыв вежлалан суффиксъяс. Гиж.

Сиктын эм (*мый?*) **библиотека**. Петі (*кытысь?*) ... .  
Пыралі (*кытчө?*) ... . Волі (*кытчөдз?*) ... Муні (*кысянь?*) ... .



**109 удж.** Мый өткодъыс да мыйён торъялөны сетөм кыв гозъясыс?

Лэбач — лэбачьяс, вокъяслы — вокъяскөд, ноппын — ноппысь, потшөсьяслань — потшөсьясянь, Сыктивкар — сикт.

**110 удж.** Лыдды. Торйөдөм эмакывъяссө гиж, сувтөд на дорө юалөмъяс да инды кыв вежлалан суффиксяссө. Төдмав вежлөгсө таблицаө видзөдөмөн.

### **Меж да кань йылысь.**

Вөлөмкө, каньясыд оз сөмын **понъяскөд** лөсявны. Со мый висьталіс Ваня Попов **межлөн** да **каньлөн** ёртасьөм йылысь.

— Миян вөліны ичөтик меж да кань. Межсө шуисны **Сьөдукөн**, а каньсө — **Васькаён**. Первойсө найө өтамөдсьыс полисны. Паньдасигөн кань лэптас бөжсө да заводитас чушкыны.

Көдзыд дырйи межөс пыртлывлім **керкаө**. Регыд найө күтісны лөсявны. Мыйён **Сьөдукөс** пыртам, Васька пырысьпыр котөртас сы дорө.

Тулыслань **Сьөдуклы** и гидын лои шоныд. Но **Васькалы** өтнаслы вөлі гажтөм. Сійө пыр и котөртас меж дорө.

Гожөмнас Сьөдук ыж **стадакөд** мунө йирсыны. А Васька пуксьө кильчө вылө да виччысьө **межлысь** локтөмсө.

*«Юный натуралист» журналысь*

**?** Лөсьөд серамбана гижөд гортса пемөсьяс йылысь.

## 14 §. Эмакыв вежлөгъяслөн юалөмъяс да суффиксъяс.

Эмакывъяслөн кыв вежлалан суффиксъясыс лөсялөны дас квайт вежлөглы (падежлы). Быд вежлөглөн аслас юалөм.

Вежлөг нимъяс	Юалөмъяс	Суффикс	Эмакывъяс
Нимтан	кодї? мый?	—	<i>Вок, Вөр</i>
Асалан	кодлөн? мыйлөн?	- лөн	<i>Воклөн, Вөрлөн</i>
Босьтан	кодлысь? мыйлысь?	- лысь	<i>Воклысь, Вөрлысь</i>
Сетан	кодлы? мыйлы?	- лы	<i>Воклы, Вөрлы</i>
Керан	кодөс? мый?	- өс	<i>Вокөс, Вөр</i>
Керанторъя	кодөн? мыйөн?	- өн	<i>Вокөн, Вөрөн</i>
Öтвывтан	кодкөд? мыйкөд?	- көд	<i>Воккөд, Вөркөд</i>
Торйөдан	кодтөг? мыйтөг?	- төг	<i>Воктөг, Вөртөг</i>
Могман	кодла? мыйла?	- ла	<i>Вокла, Вөрла</i>
Ина	кодын? мыйын? (көні?)	- ын	<i>Вокын, Вөрын</i>
Петан	кодысь? мыйысь?	- ысь	<i>Вөрысь</i>
Пыран	кодө? мыйө? кытчө?	- ө	<i>Вөрө</i>
Матыстчан	кодлань? мыйлань?	- ань	<i>Воклань, Вөрлань</i>
Ылыстчан	кодсянь? мыйсянь?	- сьянь	<i>Воксянь, Вөрсянь</i>
Вуджан	кодөд? мыйөд? (кыті?)	- өд	<i>Вөрөд</i>
Воан	кодөдз? мыйөдз? (кытчөдз?)	- өдз	<i>Вокөдз, Вөрөдз</i>

Эмакывлысь вежлөгсө колө төдмавны юалөмъяс серти.

**111 удж.** Гиж, эмакывъяссö сувтöд колана вежлөгö да инды вежлөгсö.

Öньö пукалö (пыж). Сійö талун (батыс) мунö тшак вотны. Батыс веськөдіс (пыж) кутшöмкö (ты). (Ты) ваыс сьöд, некыт оз вөрззы. Сöмын (пелыс) сыныштöмысь артмöm **кытшъясыс** разавлісны сьöрсьөн-бöрсьөн. Ты гөгöрыс вөрззытөг сулалісны пидзöсöдзыс (ва) томиник **кыдзьяс**.

*М. Сажина серти*



Гөгөрвоөд гижанногсö торйöдöм кывъяслысь.

**112 удж.** Сувтöд сетöm кывъяссö керанторья, могман, ина вежлөгьясын, öтка и уна лыдын. Лöсьöд кывьяс отсөгөн сёрникузяяс.

Велöдысь, гижысь, велöдчысь, класс.

**113 удж.** Лыдды, висьтыслы сет ним. Гиж торйöдöм эмакывъяссö да инды кыв вежлалан суффиксьяссö; висьтав вежлөг нимсö.

**Вотчысьясöс** паныдаліс кузь туруна васöд места. Батыс -джуджыд сапöгнас кокныда восьлаліс **вутшкысь вутшкö**. Сійö вуджис **нюрсö**. А **Öньö** сулалö. Вермас-ö сійö вуджны вöрысь вутшъяс вывтi? Сапöгас на мисьтöm нүйт ваыс вермас пырны.


— Лок, Андрюш, лок! Эн пов!

Öньö мөдöдчис... **Сьөлöмыслы** лои кокныд да долыд: сійö веніс **сьöкылунсö**.

*М. Сажина*

**114 удж.** Лосьод сетом кывъясись сёрникузяс да гиж.

**Коля, Дима, да, Андрейясö,** дасьтыны, урокъяс, локтисны. Кывбур, медводз, велодны, шуисны. **Небөг,** сьорсьыс, Дима, вайис. Андрей, паныда, пуксис, сийö, **креслöö.** Пукалис, вылын, диван, Коля.

 1. Кутшом юаломъяс вылö вочавидзöны торйöдом эмакывъясись?

2. Кызди колö тöдмавны эмакывъясльсь вежлөгъяссö?


**115 удж.** Вежлав ёрт эмакыв сідзи, медым сийö вочавидзис татшом юаломъяс вылö: *кодлы? кодöс? кодкөд? кодсянь?* Лосьод сёрникузяс.

**116 удж.** Öшинь эмакыв вежлав сідзи, медым сийö вочавидзис татшом юаломъяс вылö: *мыйын? мыйлань? мыйöдз?* Лосьод сёрникузяс.

**117 удж.** Гиж. Содтав эмакывъясль юаломъяс отсöгөн колана вежлөг суффиксъяссö.

(*Кодлы?*) Гриша... 10 арöс. Сийö радейтö (*мый?*) спорт... . Быд асыв вöчö зарядка, мысьсö коскөдзыс көдзид (*мыйөн?*) ва... . Тöлын ислалö (*мыйөн?*) дадь... да лыжи... . Кужö котравны и конькиён.


Гриша кöсийö лоны (*кодөн?*) спортсмен... .

 Визьнит орччөн сулалысь кык öткодъ небыд согласнöя кывъяссö.

**118 удж.** Лосьод сёрникузясыс текст да гиж.

1. Весиг мамыслөн тшөктөм эз ков. 2. Шонді вөлі зэв кывзысысьон да зільон. 3. Оліс-выліс өти ичөтик грездын Маша нима нывка. 4. Ичөтик ведраон котраліс вала, пыртліс пес, чышкаліс джодж, мыскаліс тасьті-пань. 5. А прөст кадө ворсіс аканьон да велөдчис лыддысьны, лосьодчис пырны школаө. 6. Мамыс сійос шуис Шондіон.

*В. Лодыгин серти*

 1. Бөрйы текстсыд индөм вежлөгяс дорө эмакывъяс, петкөдлы кыв вежлалысь суффиксьяссө.

Нимтан — ...

Керанторъя — ...

Асалан — ...

Пыран — ...


**119 удж.** Лосьод сикт эмакывйөн сёрникузяс, медым эмакывъясыс вочавидзисны *кысянь? кытчөдз? көні?* юалөмъяс вылө.

### *15 §. Уна лыда эмакывлөн вежлөг суффиксьяс.*

**120 удж.** Лыдды. Торйөдөм кывъясыс инды кыв вежлалан суффиксьяс. Төдмав вежлөгсө.

Син водзас Степан Ивановичлөн аслас грездыс. Туй пөлөн пөлөстчөм **керкаяс**. Öтарас туй вылө видзөдөны **өшиньяс** да **кильчөяс**, а мөдарас керкаясыс бергөдчөмаось **стыньясон**. **Звөзьяс** важон нин абуось: сотісны **пачьясын**, эз кут ковны звөзыс турун **додьястө** сараяд лэптыны. Уна керкаын өшиньяссө тупкалөма **пөвьясон**.

*И. Изъюров*

 **Звөз** — вöснi керъясысь вöчөм пос, кытi сарайö додь-  
ясөн пыртлісны турун.


**Стын** — сиктса керкалөн юкөн, көні эм турун  
видзанін, мөс карта.

**?** Кутшөмөсь керкаясыс тіян сиктын?

**121 удж.** Лыдды, инды эмакывъяссö да висътав налысь  
лыдсö.

Дзор тошка коз пуяс, багатыр **ниаяс**,  
Тшап юра пожөмъяс, меліник ньыв **пуяс**  
Узисны, вөталіг вөт.

*Илля Вась*

 Торйөдөм кывъяслысь висътав гижанногсö.

Уна лыда эмакывъясын вежлөг суффиксясыс содтыс-  
сьöны **-яс-** суффикс бöрын.

*Велөдчысь-яс-сянь, ты-яс-өдз.*

**122 удж.** Лыдды да висътав сюрөссö. Уна лыда эма-  
кывъяссö гиж, пасйы суффикссö.

### **Чолөм, парма!**

Пармаысь<sup>2</sup> немтор повны. Суас кө вой, коз пу лэдзас  
улас узьны. Көдзыд кө поводдяыс — бипур дорын узян.  
Ылалан кө кытчөкө — шонді да **пулапъяс** индасны, кодарö  
мунны. Горшыд кө косьмө, **шоръяс, ключьяс** юкталасны,  
сетасны<sup>2</sup> эбөс.

*И. Коданёв серти*

**123 удж.** Инды сетом эмакывьясысь вежлөг суффиксь-яссö, тöдчöд кывйын сулаланінсö. Тöдмав вежлөгсö.

Шоръясысь, ключьясысь, пу лапьясысь.

**124 удж.** Лыдды.

### **Отсалам лэбачьяслы.**

Челядь, ті тöданныд, кутшöм ыджыд пöльза вайöны вөрлы лэбачьяс. Татчö кольчысь лэбачьяс оз сэтшöма повны кöдзыдысь, кызди тшыгьялöмысь. А тöлын корсьны кынöмпöt абу кокни. Налы колö тiянсянь отсöг.

Водзвыв колö дасьтыны вердчанінъяс да лэбач сёян. Позьö чукöртны йөн юр кöйдыс. Вöv шомкор кöйдыс радейтöны сöмын жоньяс, льöмкайяс, ньывкайяс. Вотöссö колö чукöртны кынмыштöм бöрын — октябрын. Петшөр кöйдыс дасьтöны водз арсянь.

Таво кö энö удитöй, чукöртöй турунъяссö мöд во, вöчöй наысь корöсьяс да косьтöй. А тöвнас пукталöй найöс вердчанінö. Энö шыблалöй арбузлысь, дынялысь да тыквалысь кöйдысь-яссö. Тöвнас лэбачьяс окотапырысь чöсмасясны семечкиён, кöнтусьён, нянь чирьясён, дубыд гос торьясён, зöрийён, про-саён да мукöд пöлöс шыдöсөн.



1. Гөгөрвоöd лэбач да быдмөг нимьяс Коми-роч кыв-чукөр серти.

2. Мый могысь лöсьöдöма тайö текстсö да кодлы сійö веськöдöма. Лыдды текстсысь корöм да велöдöм.

3. Гиж эмакывьяссö, пукты на дорö юалöмьяс. Тöдмав налысь лыд да вежлөг.

**125 удж.** Гиж. Содтав кыв вежлалан суффиксьяс.

1. Аддза: (*мыйӧн?*) пищаль... со мунӧ

Сьӧла кыйны коми морт.

**Гортса** олӧм сылӧн вунӧ,

Ылӧ кольӧма нин горт.

2. (*Мыйтӧг?*) Туй... ӧтнас ветлӧ сійӧ,

(*Кӧні?*) Вӧр... нинӧмысь оз пов.

Уна **вӧрса** пӧтка кыйӧ.

Уна (*кодлысь?*) звер... босьтӧ лов.

*М. Лебедев*



Инды торйӧдӧм кывъясысь кыввужсӧ да кыв артмӧдан суффикссӧ.

**126 удж.** Гиж юӧртӧм:

а) Кутшӧм сиктын тэ олан?

б) Кутшӧм вӧръяс эмӧсь сикт дорад?

в) Кызди шусьӧны матысса вӧръяс, кушинъяс, видзъяс, шоръяс?

г) Кӧні вотанныд чӧд, пув, тшак?

**127 удж.** Лыдды. Гиж торйӧдӧм кывъяссӧ уна лыдӧ да колана вежлӧгӧ сувтӧдӧмӧн.

Важӧн коми войтырыд ёна гажӧдчылісны **сикт...** . Ветлісны ӧта-мӧд ордас, рытйысьлісны. Локтасны вӧлі кипом **удж...**: нывъяс кодӧ печканӧн, кодӧ кысянӧн, кодӧ вышивайтчан-**вурсантор...** , а зонъяс — сапӧг **дӧмсян...** , пила **кеслан...** . Чукӧртчасны кутшӧмкӧ шаньджык ӧтка пӧрысь гозъя ордӧ да коллялӧны кузь арся да тӧвся **рыт...** кипом удж сайын.





**128 удж.** Лосьод нейджыд висьт серпас да сетом план серти. Пырт висьтад уна лыда эмакывъяс. Юрнимав висьтто.

П л а н.


1. Кор тайо вөлі?
2. Кодъяс шойчисны бипур дорын?
3. Мый висьталіс ёртъясылы Илья?

## 16 §. Эмакыв вежлөг суффиксыяс гижанног.

**Асалан, керан, өтвывтан, торйөдан, пыран, вуджан, воан** вежлөг суффиксыасын шусьö да гижсьö **ө**: *Ваö, Валөн, Ваöдз, Ваöд, мортлөн.*

**129 удж.** Гиж. Содтав вежлөг суффиксыассö.

Игорь да Саша мунисны вөр... . Вөр... кыпид да гажа. Гөгөр кылö лэбачьяс... дзользьём. Пуяс костöд кык друг аддзисны йöra... пиыс... . Игорь да Саша кутисны надзöникөн кыссыны юлань. Детинкаяс дыр любуйтчисны йöraяс... .


 **1. Йöралөн, йöraös, йöraödз** эмакывьясысь инды вежлөг суффиксыассö. Кутшöм гласнöй гижсьö кыв вежлалан суффиксын?

**2.** Висьтав **кыссыны, дзользьыны** кывьяслысь гижанногсö.

**130 удж.** Лыдды да висьтав сюрössö. Гиж эмакывьяссö, тöдмав налысь вежлөгсö, лыдсö.

### Катша.

Катшалөн<sup>2</sup> бордьясас эмöсь еджыд чутьяс. Юрыс, мышку вылыс да бöжыс сьöд, а морöсыс еджыд. Кытөн катша, сэни и сылөн китшкём кылö. Катша медся ёна радейтö ворсны югыдторьясөн. Сийö синьясысь<sup>2</sup> кöзьякалы лоö дзэбны и паньяс, и пуртьяс, и вилкияс. А вöрын сийö усьласьö кöчпиян да урпиян вылö. Урьяслөн да кöчьяслөн мамьясыс оз радейтны катшаясöс.

 Визьнит эмакывъяссö, кöни вежлöг суффиксьясын гижсьö гласнöй ö.

? Тöдмав текст сикассö (юöртöм, серпас).

Т ö д м а в. *Кузь бöжа, сьöд юра, еджыд морöса.*


**Петан, ина, босьтан, сетан** вежлöг суффиксьясын шусьö да гижсьö **ы: пулысь, челядьлы, ёртлысь, школаын.**

**131 удж.** Гиж. Юалöмъяс отсöгөн тöдмав вежлöгсö торйöдöм эмакывъяслысь, пасйы суффиксьяссö. Висьтав гижанногсö.

### Коді кöзяиныс?

Коля да Ваня аддзисны улича вылысь **доймöм понйöс**. Сылөн вöли чегöма<sup>1</sup> кокыс. Кык друг шуисны понсö Бускоөн да öтлаын кутисны дöзьöритны **сийöс**. Детинкаяс вензисны, кодныслы лоны **кöзяинөн**.

Öтчыд найö мунисны **вөрö**. Буско котöртис водзвылас. Виччысьтöг лесник керкасянь<sup>3</sup> Буско вылö уськөдчисны зэв ыджыд кык пон. Ваня повзис да кавшасис пу вылö. А Коля кватитис бедь да уськөдчис мездыны **Бускоöс**. Лесник отсалис сылы. Ваня лэччис пу вывсянь да чöv олис. Артмö: **Бусколөн** кöзяиныс — Коля.

-  1. Висьтав, кутшöм нимъяс гижсьöны ыджыд шыпассянь.  
2. Инды йитöдъяссö сёрникузяяс костысь.

### 132 удж. Лыдды. Висьтав сюрөссө.

Лёва некымын лун нин велөдө **көрпиөс** ветлөдлыны верзьөмөн. Но көрпи нёровтчө да уськөдө **Лёваөс**. Детинка сетө **Авколы** нянтор да выльысь чеччыштө мыш вылас. **Көрпи** первойсө видзчысьөмөн, а сэсса збойджыка восьлалө водзлань.



Кыдзи мөд ног позьө шуны *нёровтчө*?



1. Сувтөд юалөмъяс торйөдөм эмакывъяслы да инды суффиксьяссө, төдмав вежлөгсө.

2. Вежлав **көр** эмакыв татшөм ногөн, медем вочавидзис *кодөн? кодлысь? кодлы?* юалөмъяс вылө. На отсөгөн лөсьөд да гиж сёрникузяяс.

**133 удж.** Гиж мөд столбиксьыс лөсялана эмакывъяс пыртөмөн сёрникузяяс. Инды эмакыв вежлалан суффиксьяссө.

- |  |          |
|--|----------|
| 1. Миша ... весалисны асывнас кыйөм черисө.          | чумө     |
| 2. Мамыс чери весалөм бөрын пырис ... лөсьөдны сёян. | кыньпилы |
| 3. Миша петкөдіс ... уль яй торъяс.                  | мамыскөд |
| 4. Кыньпи полис на да эз пет аслас ...               | чомйысь  |

## 17 §. Рочысь пырём эмакывъяс гижанног.

**134 удж.** Лыдды да орччөд. Кутшөм вежсьөмъяс казялін?

**Рочөн**

степь

морковь

букварь

**Комиён**

степ

морков

буквар

Рочысь пырём эмакывъясын кыв помын **ь** оз гижсьы:  
*январ, сентябрь, декабрь, якөр, багатыр.*

**135 удж.** Лыдды. Гиж төлысь нимъяссө комиён да рочөн.

төв шөр

урасьөм

рака төлысь

кос му

ода-кора

лөддза-номъя

сора төлысь

моз төлысь

көч төлысь

йирым төлысь

вөльгым

өшым

январь

февраль

март

апрель

май

июнь

июль

август

сентябрь

октябрь

ноябрь

декабрь

**136 удж.** Буквар, календар, словарь кывъяс гиж уна лыдын, гөгөрвоөд налысь гижанногсө.

**137 удж.** Төдмав төлысь нимъяссö да гиж сёрникузяссö.

1. Öкмысöд төлысь пуксьöмкөд заводитчö велөдчан во.
2. Колис нин дас öтиöd — арлөн медбөрря төлысь.
3. Дас кыкөд төлысь — волөн пом.
4. Медводдза төлысь — выль волөн заводитчөм.

**138 удж.** Орччөд кывъяссö.

Звер — зверьяс; степ — степьяс; токар — токарьяс.

Рочысь пырөм кывъясын уна лыда суффиксьяс водз-  
вылын гижсьö **ь**: *словарьяс, степьяс.*

Морт нимъясын **я** водзын гижсьö **ь**: *Марья, Агафья,  
Прасковья, Аверьян, Валерьян.*

**139 удж.** Гиж торйөдөм кывъяссö. Висьтав гижанногсö.

Ывла вылын вежсьöмьяс йылысь ми нуодам **календар**. Пасьялам **календарö** быд лун. **Календарсö** нуодны заводитим **сентябр** төлыссянь **Игор**, Сеня да ме. **Игорлы** колö вöли пасьявны поводдялысь вежласьöмсö. Сеня гижалис пемöсьяс<sup>3</sup> йылысь, а ме пасьяли йөзлысь<sup>3</sup> удж.



1. Инды висътсьыс орччөн сулалысь небыд согласнöя кывъяссö да подулав налысь гижанногсö правилöөн.

2. Висьтав, кызди позьö пасьявны поводдялысь вежсьöмьяс.

**140 удж.** Гиж эмакывъяссö правилö серти.

Дар...я, Игор...öс, январ...ын, Мар...я тьöt.

## 18 §. Тэчаса (сложной) эмакывьяс.

**141 удж.** Индав эмакывьяслысь кыввужьяссö.

Рытыввыв, турипув, чунькытш, синва, асывводз, вижъ-  
юр, уртшак, юрси.



1. Кымын кыввужйысь артмöмаöсь эмакывьясыс?
2. Кыдзи гижöма найöс?

Кык кыввужйысь артмöм эмакыв шусьö **тэчасаөн** (сложнойён): *сьöлаоз, асывводз, войтва, удждон, нырборд.*

**142 удж.** Лыдды да тöдмав, мыйла тадзи шуöны вотöсь-  
яссö.

**Сьöлаоз** — быдмög ним, артмöма **сьöла да оз** кывьясысь. Йöз, тыдалö, казьявлöмаöсь, мый тайö вотöссö радейтö кокавны **сьöла**. Кывлön мöд юкöныс, **оз** кыв, нуö тэчаса кывлысь шөр вежöртассö — быдмög сикас, тусь.

**Турипув** — тэчаса эмакыв, артмöма **тури да пув** кывьясысь. Тайö вотöсыс быдмö нюрын, сэнi жö олöны **турияс** да чöсмасьöны тайö вотöснас. Турипув кывлön мöд юкöныс нуö кывлысь шөр вежöртас — пув, пув сяма тусь, плод.

*Г. Бараксанов серти*



1. Гиж, мый содтöд тöдан тайö вотöсьяс йывсьыс.
2. Думышт да гиж мукöд вотöс йылысь.

**143 удж.** Инды тэчаса эмакывъяслысь кыввужъяссö.

Ягдор, Вильгорт, Сыктивкар, Тыдор, Матвейгрезд, Паныёель, выйчери, ыбкай, енкай, турунчöж (утка), гөгвуж (турун), ситурун, турипув.

Быдмөг, ловъя лов да места ним петкөдлысь тэчаса (сложной) эмакывъяс гижсьöны öтлаын: *тусяпу, ловпу, гөрдъюр, сиргаг, юрсигусь, Важгорт, Чукачой.*

**144 удж.** Лöсьöд сетöм кывъяснас сёрникузяяс, медым артмис нейджыд висьт.

Бипур, юква, чардби, войтва, öшкамöшка, лысва.

Висьтсö заводит тадзи. *Ю дорын ломтысис бипур. Пöртйын челядь пуисны юква.*

**145 удж.** Артмөд кыввужъясысь тэчаса кывъяс да гиж.

лун	кор	си	син
пась	оз	катша	выв
тури	выв	пос	бöж
коля	пув	кöм	турун
шом	кöм	вой	кот
лов	пу	сьöд	водз

**146 удж.** Гөгөрвоөд кывлысь вежөртассö кыв юкөнъяс вежөртас вылö мыджсьöмөн.



Бадькормык, вирсин, вадоркай, льёмкай, пелыськай, съодкай (ябыр), съодбөж.

В о ч т а д з и. Вөркань — вөрса пемös. Нимсö сетö-маöсь пемös рöd сертиыс (кань) да оланін сертиыс (вөр).

### *19 §. Визь пыр гижан тэчаса эмакывьяс.*



Лыдды, мөвпышт, кутшөм вежөртас кывьясыслөн.

Чой-вок, съола-тар, видз-му, бать-мам, ныр-вом, вөр-ва.

Эмакывьяс гижсьöны **визь пыр**:

а) кор найö петкөдлöны öтвыв босьтöм кык либö уна предмет: *чой-вок, эня-ныла, бать-мам*;

б) кор петкөдлöны паныд вежөртас: *лун-вой, асыв-рыт, тулыс-ар*.

**147 удж.** Лыдды висьтсö, сэсся гиж. Индав тэчаса кывьяссö, визьнит.

Вöли война кад. Миян бать усис война вылын, а сэсся регыд кувсис мамным. Колим ми нель чоя-вока. Ме вöли медыджыд. Овны вöли вывтi съöкыд. Зэв дзескыд вöли сёян-юанысь, чай-сакарысь, көм-паськöмысь. Тöлын ме ветлывлi кыйны съола-тар, а арын вотлывлi тшак да пув.

*И. Торопов серти*



Төдмав **усьны** кадакывлысь вежөртассо сетом кывкуд серти:

- 1) усьны кысянькө вылісянь муо: *лэбач уси позйысь;*
- 2) кувны, пөгибнитны: *дед уси война вылын;*
- 3) кыськө видзчысьтөг локны, аддзысьны: *кытысь тэ усин?*
- 4) водны, пөрны (турун, нянь йылысь): *зэр вёсна туруныс уси;*
- 5) отывйтчыны (ю, шор йылысь): *Сыктыв усьё Эжвао;*
- 6) вежсьыны (гөнлы, юрсилы линияйтны): *гёныс усьё;*
- 7) тшыксьыны (туй йылысь): *төвся туй уси;*
- 8) ямны: *Ваыс уси.*

**148 удж.** Лосьод да гиж сёрникузяс **чоя-вока, бать-мам, ая-пия** эмакывьясөн.

**149 удж.** Кыдзи артмөмаось сетом кывьясыс? Висьтав, кутшом тайо эмакывьяс. Кыдзи найо гижсьоны?


Сьодбөж, зарава, мама-ныла, лысва, понтшак, керка-карта, пельпом, шомкор, ты-мус.

**150 удж.** Гиж колана ногон скобкаын сетом сложной эмакывьяссө.

1. (Звер пөткэлөн) горалөмыс гажөдіс (вөр васө). 2. Лэчид төв орөдө (ныр вомтө). 3. Тайо муса кылөн (чой вок) сёрнитоны. Тайо кылөн меным (ай мам) бурсиёны.

**151 удж.** Бөрйы да гиж сөмын тэчаса эмакывьяссө. Гөгөрвоод налысь гижанногсө правилө сертиыс.

1. Шызис вөр-ваыс морт шыясөн. Ая-пия уджалісны вөрүн. Важ моз пила-черён оз пөрөдчыны, уджалёны электропилаён. 2. Чоя-вока велөдчёны өти школаын. 3. Радейт ассыд вөр-ватө, видз-мутө. 4. Лун-вой кольө өдйө, арлыд содө рөдйөн.

 Кызди тэ гөгөрвоан шусьөгсө «Лун-вой кольө өдйө, арлыд содө рөдйөн»?

**152 удж.** Лыдды да висьтав сюрөссө.


### **Лэбачьяслөн сёянін.**

Төв кежлө быд во **өшинь улас** Миша сувтөдө ичөтик пызан. Тайө лэбачьяслөн<sup>2</sup> сёянін<sup>1</sup>.

Гөрд морөса **жоньяс**, мудер **пышкайяс**, ичөтик пыстаяс **төвбыд** пөтөсь. Найө чирзёны, **чеччалёны**, весиг косьөдз волёны.

Пызан вылысь сёян-юан оз бырав, а лэбачьяс век зильёны заптысьны.

Пышкai торья нин горш да мудер. Мукөдьяс вөсна сійө оз төждысь. Пыстаөс кө **аддзас** пызан вылысь, лэптас гөнсө, кутас горзыны. Пысталы<sup>3</sup> быть лоө мунны.

 Инды тэчаса кывьяссө да гөгөрвоөд гижанногсө.

**153 удж.** Лөсьөд «Лэбачьяслөн сёянін» висьт серти план да гиж изложение. Гиж торйөдөм кывьяссө өшыбкаястөг.

**154 удж.** Гиж, содтав эмакывьяс лөсялана вежлөгө сувтөдөмөн.

Анналон ... быдлаын тӧдчӧ. Ставсӧ бура идралӧма. Сійӧ ... сӧр рытӧдз ноксьӧ аслас быдтасъяс дӧнын. Рытъясын Анна уна **лыддысьӧ**. Лыддӧ тшӧтш журнал «...».

С о д т ъ м в ы л ъ к ы в њ я с: *киподтуй, асывводз, «Чушканзі».*



Гӧгӧрвоӧд торйӧдӧм кывлысь гижанногсӧ.

**155 удж.** Лыдды. Подулав торйӧдӧм кывъяслысь гижанногсӧ правилӧясӧн.

### **Мойд.**

Кор шондӧ кайӧ вылӧ-вылӧ  
Да асъя колип юргӧ-сьылӧ,  
Сэк ставыс гӧгӧр **мойдкыв** кодь.  
А еджыд руыс сылӧ, сылӧ,  
И **вӧр-ваыслӧн** чужӧм вылӧ  
Сэк кольӧ югыд **лысва** войт.

*Е. Козлов серти*

**156 удж.** Гиж тэчаса кывъяссӧ кык столбикӧ. Гӧгӧрвоӧд кывъяслысь гижанногсӧ. Лӧсьӧд тэчаса кывъяссӧ пыртӧмӧн вит сӧрникузя.

Керка-карта, коляоз, вӧр-ва, видз-му, зарава, чери-яй, черинянь, турипув, ныв-зон, ягсер.


Г и ж т а д з и. *войтва* *бать-мам*

**157 удж.** Гиж скобкаяссӧ восьталӧмӧн.

Азыма ломалысь (би пур)! Кымын мортӧс<sup>2</sup> сійӧ шонтӧ да косьтӧ. Кымын мортӧс (чӧсмӧдӧ вердӧ) чӧскыд (шыд рокӧн), (юк ваӧн) да чайӧн.

Пось паччөр вылын моз сы дорын шойччывлөны мудзём  
вөралысьяс да чери кыйысьяс<sup>2</sup>.


*И. Коданёв серти*

 Гөгөрвоод **азыма** кыв.

**158 удж.** Лыдды. Гиж торйөдём кывъяссө, висътав налысь  
гижанногсө.

Миянлысь сиктнымös быд боксянь мичмөдöны пуяс. Сикт-  
сянь неылын пашкыртчöны кызьяс, **льём (пуяс)**. Ылынджык  
быдмöны **(пи) пуяс**, коз да **(пожём) пуяс**. Озырöсь **(лэбач)**  
**пöткаөн** тайö вөрьясыс.

Ичöтысянь ми, зонпосни да нывпосни, велалём кывзыны  
лэбачьяслысь<sup>2</sup> сьылём. Быд ар сикт весьтти лэбзьöны уна  
**(утка) дзодзөг**.


 Төдмав эмакывьяслысь вежлөгсө, лыдсö.

## **20 §. Эмакывьяскöд кывбөрьяс гижём.**

**159 удж.** Лыдды. Индав эмакывьяссө.

Лёва да Петя кежисны пожöма вөрö. Пуяс **костöд**  
тыдовтчис төдса эрд. Лымыйс топалöма нин му **бердöдзыс**.  
Гөгөр чöv-лөнъ. Эрд **весьтас** сынöдыс быттьö друг вөрзьяштіс.  
Öти пожём **бокысь** вешйис сьöd звер. Тайö вöлі йöра.

*К. Туркин серти*

 Гиж эмакывьяссö төдчөдём кывьяскöд.

Эмакывъяс бöрын вермасны сулавны кывбöръяс.  
**Кывбöръяс эмакывъяскöд гижсьöны торйöн: дöска дорын, ю сайын, керка бердын.**

**160 удж.** Лыдды да висътав сюрöссö. Лöсьöд висътлы пом.

I. Тайö вöли ай йöра — **войвыв** муын олысь медыджыд звер. **Ныр-вомыс** мöслөн кодъ жö, мыш вылас неыджыд гöрб. Со сийö сувтис пöрöм пу динö, оз аддзы вужля сайысь челядьöс.

II. Чуймöм детинкаяс дзоргöны вöрын олысь ыджыд пемöс вылö. Лёва зарадитис ружьесö. Резьöбтис вывлань.

III. Шков лыйöмсьыс йöра кынмылис места вылас, суныштлис повзьöмысла, сэсса, кокъяс улас видзöдтöг, тöвзис водзö.

*К. Туркин серти*





1. Висьтав гижанногсö торйöдöм кывъяслысь.
2. Гиж эмакывъяссö кывбөръяскöд таdzi: *Мыш Вылас, куст динö, ...*
3. Висьт сертиыс лöсьöд план да гиж изложение.

**161 удж.** Сетöм кывтэчасъясöн думышт да гиж сёрникузяс, кывбөръяссö визьнит.

Лым кузя. Вөр керка дорын. Пöльыс динö.

**162 удж.** Лыдды колана шуанногöн. Гиж эмакывъяссö кывбөръяскöд.

### Пышкai-стөрöж.

Садйын | туй вылас | чеччалісны томиник пышкайяс. || А пöрысь пышкai | пуксьöма пу вылö | да сюся видзöдö.||

Лэбö варыш карта сайясті | лöня, | шытөг. || Сійö | пыр матынджык.|| Тöждысьöмөн мöдіс чирзыны | пышкай. || И став пияныс | дзебсисны кустьясö. ||

Гөгөр лөнис<sup>2</sup>. || Сöмын пышкай-стөрöж | пукалö пу ув вылын, | синъяссö варыш вылысь оз вештыв.

**?** Паськöд шөр юкөнсö ассяньыд содтöм сёрникузясöн.

**163 удж.** Гиж скобкаяссö восьталöмөн. Кывбөръяссö визьнит.

Джуджыд вöра пармаяс (пövстöд), мича ягъяс (пыр), расъяс (вомөн), веж туруна видзяс (дорöд), посныдик коми сиктыяс (пöлөн) войвывсянь лунвылö визувтö Висер ю.

*Тима Вень*

**164 удж.** Лыдды да висътав сюрössö. Гиж кывбöра эмакывъяссö.

### Усьöм кор.

Гожöмбыд уджалісны пулön коръяс. Найö вердісны пусö. А öні лоины ковтöмось, гылалісны муö.

Веж гожöм помасис. Корйыс öні усьöма, куйлö му вылын. Но и тайö усьöм корйыс ковмылас на вöрса олысьяслы.

Ёж вöчас наысь шоныд поз, дзебяс кöдзыдысь<sup>4</sup>. Пу улын куйлысь кор оз лэдз быдмыны турунлы, пöдтыны пу кöйдысьяс.

Тöv улын да зэр улын сісьмасны коръяс<sup>2</sup>, вынсьöдасны мусö.



Кызди гөгөрвоан «Гожöмбыд уджалісны пулön коръясыс» сёрникузя?

**165 удж.** Лыдды текстсö да висътав сюрössö. Торйöдöм кывъяслысь гөгөрвоöд гижанногсö.

### Тöлка утка.

Вöлі шоныд, лөнъ рыт. Войбыд син эг куньлöй, а **сьöлöм вылын** долыд.

Асывнас ёрткöд мөдöдчим пес корсьны. **Туй вомöныс** куйліс пөрöм пожöм. Ме черөн<sup>3</sup> керышті косьмöм увсö.

Друг **кок улысь** чепöсйис ыджыд горда. Сійö видзöдіс ме вылö нораа да быттьö мыйкö корис. Воськовті сылань, а сійö катласьöмөн котöртіс водзö.

Ёрткöд ми пөрöм **пу улысь** аддзим утка поз. Позйын<sup>2</sup> куйліс турунвиж рöма öкмыс кольк. Уткалысь позсö вермасны жугöдны руч, ласича либö тулан, а тайö поздысьöма **туй дорас**. Буракö, уткаыд эскö мортыдлы<sup>3</sup>.

*И. Коданёв серти*





1. Гижөмөн вочавидз, мыйла утка поздысьома пөрөм пу дорө.

2. Кызди мөд ног позьё шуны **чепөсйис, эскыны?**

3. Инды гижөдысь разной сикас текстлы лөсялана юкөнъяс — юөртөмлы, серпасалөмлы, мөвпалөмлы.

### **Төдөмлун вынсьөдөм вылө уджъяс.**

**166 удж.** Гиж кывъяссө правилөяс серти.

Январ... , сентябр... , звер...яс, буквар...н, инвентар...сө, ноябр... , календар... , буквар...яс.

**\*167удж.** Гиж кывъяссө да визьнит чукөрлы лөсявтөмсө.

1. Табун, стада, мазі, кельөб.

2. Му, Сатурн, Куратов, Марс.

3. Вуг, сюр, зык, ньөр.

4. Шыпас, лыдпас, шы, сёрникуза.

5. Ю, ёль, шор, ты.

**168 удж.** Гөгөрвоөд, мый лоөма предметлы татшөм ним сетан помкаөн. Гиж кывъяссө чукөръяс вылө юклөмөн:

1) шы сетөм серти;

2) олөмын да уджын коланлун либө действие серти;

3) предмет да явлениелөн кутшөмкө ортсыса признак серти.

Көк, печкан, дөмас, герчкан, катша, вирсин (чери), рака, ломтас, шебрас, пыкөд, шыран (ножич), мыссян, визяорда, съөдбөж, гулю, чипсан, ворсан (гармошка).

169 удж. Лыдды да висътав, кыдзи шулөмаось батьсö.

Яким Иван, Петыр Öльöксан, Ивö Виталей, Öньö Веня, Микаль Сандра, Лавра Володь, Пилип Дуня, Педör Сандра, Педот Кланя, Öнись Марья, Öльöш Анö, Öсип Петыр Юрик, Габö Зина, Кирö Епим Иван, Öсьö Анна.



Инды некымын вежсьöм роч кывйысь комиö вуджöдигön:

- 1) **ф** шы **п** шыön вежсьöм;
- 2) **о, а** шыяс **ö** шыön вежсьöм;
- 3) роч согласнöйяс костö гласнöй шы содтöм;
- 4) кыв дженьдöдöм.

## 21 §. Нимвежтас.

170 удж. Лыдды, вочавидз юалöмьяс вылö.

Петялön батьыс уджалö стрöйтчанінын. **Сійö** бур плötник. Батьыс дінö частö воывлöны Ваня да Славик. **Найö** кык вок.



1. Код йылысь висътавсьö медводдза сёрникузяас?
2. Мый висътавсьö бать йывсьыс мöd сёрникузяас?
3. Кутшöм кывйön вежöма **бать** кывсö мöd сёрникузяас?
4. Кутшöм кывйön вежöма **Ваня** да **Славик** нимьяс?

**Сійö** — нимвежтас. Вежö *бать* эмакыв.

**Найö** — нимвежтас. Вежö *Ваня* да *Славик* эмакывьяс.

**Ме, ми, тэ, ті, сійö, найö** лооны **нимвежтасьясөн.**  
Сёрникузяын найö вежоны эмакывьяс.

**171удж.** Гиж. Чутьяс пыдди содтав колана нимвежтасьяс.

1. Петялөн батыс стрöйтö керкаяс. ... бур киподтуя морт.
2. Ваня да Славик гожöмын уджалöны совхозын. ... куртöны турун.

**172удж.** Лыдды да индав нимвежтасьяссö.

### **Том мастерьяс.**

Детинкаяс пыртисны сарайысь<sup>3</sup> столярнöй верстак, кор-  
сисны пöвьяс. Сэсся найö кутчысисны уджö.

— Вова, пöвсö верстакас топöд. Сэсся тэ заводит стру-  
житчыны. Мудзан — ме вежа тэнö.

Ачыс Толя босьтис бумага лист, вöчис скворечниклысь  
чертёж.

Вовалөн стружйис сöмын дзижйöдліс пöвйöдыс, гартис  
сир дука стружки.

— О, тэ мастер вöлöмыд, Вова! Тадзинад ми рытöдз кык  
скворечник вöчам.

*В. Безносиков серти*

Ш у с ь ö г ь я с.

*Уджыд весиг көртлысь сім бырöдö.  
Мортöс доньялöны удж серти.*

**Ме, ми, тэ, ті, сійö, найö** — морта нимвежтасьяс.

**Ме, ми** — первой морта нимвежтасьяс. (1 морт)

**Тэ, ті** — мөд морта нимвежтасьяс. (2 морт)

**Сійö, найö** — коймөд морта нимвежтасьяс. (3 морт)

**173 удж.** Лыдды текстьяссö да орччөд.

1. Лунвывса öти заставаын служитис пограничник Павлов Никита. Никита Павлов аслас Индус понкөд кутис сёысь унджык шпионös, граница торкалысьöс. Öтчыд Павлов мунис войся нарядö. Павловкөд тшöтш вöли пограничник Харламов. Вöли тшöтш Павловлөн вернöй другыс — Индус.

2. Лунвывса заставаын служитис пограничник Павлов Никита.

**Сійö** аслас Индус нима понкөд кутис сёысь унджык шпионös, граница торкалысьöс. Öтчыд Павлов мунис войся нарядö. **Сыкөд** тшöтш вöли пограничник Харламов. Вöли тшöтш и **сылөн** вернöй другыс — Индус.

**?**

1. Код текстсö лöсьыдджык кывзыны? Мыйла?

**174 удж.** 173-өд уджса мөд юкöнысь инды нимвежтасьяссö да висьтав, кутшöм эмакывьяс найö вежöны.

Сёрниын да гижöдын оз ков вöдитчыны öти и сійö жö эмакывьясөн. Найös позьö вежны нимвежтасьясөн.

**175 удж.** Лыдды. Инды нимвежтасъяссö да висътав, кутшöм кывъяс найö вежöны.

### Автобусын.

Öньö талун автобусöн лэччö карö. Сийö пукалö мамыскöд орччөн. Кодсюрöлы местасыс абу тырмöма. Найö сулалöны. Син улас Öньöлы усис кузь тушаа мичаник нывка. Öньö чеччис местасыс да шуис сылы:

— Пуксьы.

Нывка вочавидзис:

— Пукав, пукав. Тэ ичöt на.

— Ме мудзи пукавнысö,— син пöвсö читкыртлöмөн шуис Öньö.

*М. Сакина*

 Гиж текстсö, пасйы нимвежтассö морт серти: *сийö* (3 м.)

**176 удж.** Мый серпасалöма тани? Лöсьöд висът. Вöдитчы **сийö, найö** нимвежтасъясөн да гиж.



**177 удж.** Лыддды сёрникузяссö. Гөгөрвоёд, колана ногөн-ö пыртöма нимвежтассö мөд сёрникузяс?

1. Кукань йирсьö луд вылын. Кутшöм сийö мича!
2. Кыдзьяс вылын пукалöны жоньяс. Найöс вевттьöма небыд лым.
3. Зонка дорö ваткыльтис-котöртис понпи. Сийö радысла легöдис бöжнас.
4. Пожöм пулань матыстчис йöра. Сийö вöли ыджыд, ён, мича.
5. Кань аддзис руд пышкайöс. Сийö пукалис öмидз куст улын.

**178 удж.** Лыддды шыödчöмсö. Кутшöм нимвежтасьяс эм текстын.

### **Дона лыдддысьысь!**

Тэнад кийн выль вося «Би кинь» журнал. Во чöжөн воас тэныд журналлөн дас кык номер. Коми гижысьяс, журналистьяс, художникьяс зильöны, медым «Би кинь» лоис тэныд виччысяна бур ёртөн.

Тэ, дона лыдддысьысь, казялін нин, мый челядь гижöдьястöг да серпасьястöг оз пет журналлөн ни öти номер. Эскам, мый и таво, дона челядь, асланыд письмöясөн тi гажöданныд ассьыныд «Би кинь» журналтö.

*Би кинь*

- ?**
1. Сюрöс боксянь кутшöм тэчас юкөнъяс колöны шыödчöмлы?
  2. Ачыд лöсьöд челядь дорö шыödчöм классын стенгазет лэдзны лöсьöдчигөн.

Шыёдчөмлөн тэчас.

1. Нимён шыёдчөм.
2. Аслад төжд йылысь висьталөм.
3. Тэнад корөм.
4. Лача (надея) висьталөм.
5. Ассьыд ним, адрес юөртөм.
6. Кад индөм, кор сетөма шыёдчөмсө.

## 22 §. Нимвежтасьяскөд кывбөрьяс гижөм.

**179 удж.** Лыдды висьтсө. Инды нимвежтасьяссө.

### Полюс вылын.

Воим полюс весьтө. **Улын** тыдалісны помтөм еджыд йи пластьяс. На **костын** төдчисны кельыдлөз ва визьяс. Миян **весьтын** тыдовтчис кузьмөс йи пласт. Сы **шөрысь** аддзим шыльыд площадка. Самолётөс пуксьөдім **сы вылө**. Миян **дінө** чукөртчисны полярникьяс.




Торйөдөм кывьяссө лыдды өтлаын нимвежтасьяскөд.

Нимвежтасьяс бөрын вермөны сулавны кывбөрьяс.  
**Кывбөрьяс нимвежтасьяскөд гижсьөны торйөн:**  
*ме дорын, тэ пыдди, на моз, сы водзын.*

**180 удж.** Лыдды, сэсся гиж. Улітіыс визьнит нимвежтасьяссө кывбөрьясыскөд.


Самолёт веськөдчис Йиа саридзлань. Пуксим мусюр вылө. Со мян динө котөртө морт. Тайө экспедицияса начальник. Регыд сы динө чукөртчисны ёртъясыс. Миян йылысь налы юөртөмаось радио пыр. Ми вайим налы газет-журналъяс, сёян-юан да письмөяс.

 Инды тэчаса эмакывъяссө да подулав гижанногсө правилөясөн.



**181 удж.** Лөсьөд серпасъяс сертиыс нейджыд висът да гиж. Пырт сетөм кывъяссө да кывтэчасъяссө.

Вася. Улөс вылын. Пидзөс вылас. Сы водзын. Сийө. Сюрк-нялөма бөжсө. На динө. Шыр бөрся.

 Визьнит висътсьыд нимвежтасъяссө кывбөръяскөд.

**182 удж.** Думышт сетөм кывъясөн сёрникузяяс, индав кывбөръяссө. Кутшөм кывсикасыяс бөрын найө сулалөны?

Керка весьтын. Ме динын. Пу бердын. Тэ йылысь. Школа дорө. Миян водзын.



**183 удж.** Лыдды. Бөрйы да гиж өти столбикö эмакывъ-  
яссö кывбөръяскöд, мөдö — нимвежтасъяссö кывбөръяскöд.

### Ёртъяс.

Март төлысь. Ме сулалі öшинь дорын да видзöдi ывла  
вылö. Öшинь улын ворсiсны челядь. Меным окота жö петны  
на дiнö. Но ме некымын лун нин вися.

Друг кыліс öдзöсö таркөдчөм. Пырисны менам ёртъясöй.  
Дыр найö пукалісны ме дiнын. Найö висьталісны школаса  
вьльторъяс йылысь.



1. Кутшөм морта нимвежтасъяс эмöсь текстын?
2. Кыдзи гижсьöны кывбөръяс эмакывъяскöд да ним-  
вежтасъясскöд?

**184 удж.** Лыдды. Төдмав текстлысь сикассö.

### Кöчъяс.

**Кöч...яс сёянтö корсьöны войын. Тайöс бура позьö  
тöдмавны кок туй сертияс. Сiйö зэв бура тöдчö лым  
вылын. Кöч...яслы лоö повны и йöзысь, и пон...ясысь,  
и руч...ясысь, и рака...ясысь.**

Югдiгас<sup>1</sup> вöрыд ловзьö. Быд шум кылыштөм бöрын кöч  
повзьöмысла заводитö öтарö-мөдарö котравны да чеччавны.  
Кор дзикöдз югдас, сiйö водö узыны. Асывнас кыйсьысьяс  
корсьöны<sup>2</sup> кöчöс кок туйяс сертияс да дивуйтчöны сылөн  
мудерлун вылö. А сiйö эз и думыштли мудеритөм йылысь<sup>4</sup>.  
Татшөм кок туйясыс артмисны полöмысла.

*Л. Толстой серти*



1. Гиж торйөдөм сёрникузяяссö, содтав колана шыпасъяс.
2. Бөрйы да гиж эмакывъяссö кывбөръяскöд.

**185 удж.** Веж нимвежтасъяссö колана ногон да йитлы кывбөръяскöд, лосьöд наон сёрникузяяс. Гөгөрвоöd, кызди вежсисны нимвежтасъясыс.

### **Нимвежтас**

ми  
найö  
ті  
сійö

### **Кывбөр**

дорын  
пыдди  
водзын  
вöсна

**186 удж.** Лыдды, велöдчы гижны письмö. Вöч кывкörtöд, мыйсянь заводитны, мый гижны шөр юкöнас, мыйöн помавны.

### **Чолөм, Сеня вокöй!**

Тöрыт на **бытьö** ме локті **татчö**, а быдса вежон нин колис. Тані лосьыд, ачyd төдан. Юыс öшинь улын, сöмын котöртышт да бузгысь. Луннас ме отсася<sup>5</sup> ыджыд мамлы. **Шойчöгпыдди** котöртла вадорö.

Кызди тэ экзаментö сдایتін? Кор верман локны татчö? Ставлөн гажыс бырöма. Висьтав чолөм менам ёртъяслы<sup>2</sup>, ме эг вунöд найöс. **Виччыся** тэсянь письмö.

*Пажга сикт, июль 20 лун. Тэнад вок Дима.*



1. Индав нимвежтасъяссö, төдмав налысь мортсö да лыдсö.
2. Гөгөрвоöd торйöдöм кывъяслысь гижанногсö.
3. Гиж письмö мамыдлы, чойыдлы, ёртыдлы.

## 23 §. Кадакыв.

**187 удж.** Лыдды сёрникузяссö да торйöдöм кывъяслы сувтöдав юалöмъяс.

1. Пуяс **сулалöны** чöла. 2. Пуяс вылын **чипсö** сьöла.



Кутшöм юалöмъяс вылö вочавидзöны торйöдöм кывъясыс?  
Мый петкöдлöны тайö кывъясыс?

Предметлысь действие петкöдлысь кывъяс шусьöны **кадакывъясöн**. Найö вочавидзöны **мый керис? мый вöчис? мый керö? мый вöчö? мый вöчас? мый керас?** да с.в. юалöмъяс вылö: *мунö, сьылис, дасьтисны, локтасны, лыддяс.*

**188 удж.** Лыдды кывбурсö, индав кадакывъяссö да сувтöдав на дорö юалöмъяс. Велöд наизусьт да висьтав вырази-тельнöя.

### Тöv.

Югыд шондi тöдö:

Эштiс **арся** удж.

Зэв нин **сёрөн** петлö,

Ветлö öти сутш.

Лэптысьö и лэччö,

Кусö **пырысь-пыр**,

Аски дыша чеччö,

**Узьö** вывти дыр.

*М. Лебедев*



Кыдзи пасйöма торйöдöм кывъясын согласнöйяслысь небылдунсö?

**189 удж.** Лыдды, висътав сюрöссö, подулав торйöдöм кывъяслысь гижанногсö правилöясөн.

### Ильяös корсьöм.

**Мишка** тöдса ордымöд мөдöдчис корсьны **Ильяös**. Ъвлаын кутис нин рöмдыны. Мөдис усьны лым. Мишкалы ковмис бергöдчыны, и друг ылысянь кылис горöдöм шы. Тайö шыыс быттö садьмөдис<sup>2</sup> Мишкаös. И сэк жö сийö горөдис<sup>2</sup> воча:

- Э - э - эй!

Кыйсьысьлы паныд котöртис **Лыско**. Кор воисны вөр керка дорö, Илья вокыс вöли бипур дорын нин.

*В. Юхнин серти*



Висът сертиыс гиж изложение. Улитыс визьнит кадакывъассö.



Кыдзи шуöны мөд ног **рöмдыны**?

**190 удж.** Сетöм эмакывъяс дорö юалöм пуктöмөн вайöd пемöслы да мукöд ловъя ловлы лöсялана асьсö доръян действе петкөдлысь кадакывъяс.

Вöv ..., пон ..., петук ..., тар ..., көч ..., мазі ..., чери ..., ур ... .

В ö ч т а д з и.

Мös (*мый вöчö?*) люкасьö.

**191 удж.** Төдмав предметъяссө действиенас сертиыс.  
Содты ассияныд гоз-мөд сёрникузя.

1. Лэбалө ... . 2. Увтө ... . 3. Нявзө ... . 4. Чеччалө ... .  
5. Баксө ... . 6. Гөрдлө ... .

**192 удж.** Бөрйы кадакывъяслы паныд вежөртаса кывъяс да гиж.

Пыра, кывта, муна, лэчча, радла, садьма.

Г и ж т а д з и. *Сета — босьта.*

**193 удж.** Лыдды висьтсө. Индав кадакывъяссө да гиж найөс.

### **Медводдза лым.**

Өтчыд войнас ме садьми, восьті синъясөс. Керкаын вөлі югыд. Чеччи да матыстчи өшинь дорө. Ывлаыс **вевттысьёма** лымйөн. Со кытысь югыдыс!

Кадыс вөлі кык час. А ме воді дас кык часын. Сідзкө, кык час чөжөн лымйыс удитөма вевттыны мусө еджыд эшкынөн.

*С. Раевский*



1. Висьтав торйөдөм кывлысь гижанногсө.

2. Вайөд матын вежөртаса кывъяс **вевттыны, удитөма, эшкынөн** кывъяслы. Гиж сійө сёрникузяссө матын вежөртаса кывъяснас.

**194 удж.** Бөрйы сетөм кывъяссьыс матын вежөртаса кадакывъяс да гиж.

Воис, жургө, вөтөдө, радейтө, любитө, локтіс, визувтө, сүөдө.

Г и ж т а д з и. *Воис — локтіс.*

**195удж.** Шуйга да веськыд столбикъясса кывъяс отсөгөн лосьод да гиж сёрникузяс. Визьнит кадакывъяссö.

Вöралысь

**Лэбачъяс**

Шондi

Челядь

**Кодзувъяс**


дзользисны кустъяс пöвстын.

сайöдчыштіс пашкыр коз сайö.

дзирдалісны зэв югыда.

мыччысис кымöр сайысь.

отсасьöны бать-мамыслы.

 Индав торйöдöм эмакывъяслысь кыв вежлалан суффиксъяссö.

**196удж.** Тöдмав действие петкöдлысь кывъяс серти предметъяссö.

Шонтö, югдöдö, дзирдалö ... .

Бергалöны, лэбалöны ... .

Леститчö, чеччалö, никсö ... .

**197удж.** Гиж шусьöгъяссö комиön. Визьнит кадакывъяссö.

1. Меньше говори, больше делай.

2. Семь раз отмерь, один раз отрежь.

**198удж.** Бöрйы сетöм кадакывъяс дорö лöсялана нимвежтасъяс. Нимвежтасъяслысь тöдмав мортсö.

... велöдчис, ... шогсян, ... пукаліс, ... сувтіс, ... горöда, ... бöрйисны, ... велöдчанныд, ... кывзiм, ... ошкисны.

**199 удж.** Лыдды текстсö. Аддзы кадакывъяс, гиж да сувтöд на динö юалöмъяс. Позьö-ö тöдмавны, öти морт вöчö действиесö либö унаöн вöчöны?

Важөн, кор эз на вöv югыд электричество биыд, мян пöльяс<sup>3</sup> да пöчъяс пемдöм бöрын югзьöдлісны керка пытшкöссö пеша биөн. Пешаыс артмö куимторйысь: пеша вор, сартас, сартас кутан. Пеша ворйö кисьтлісны ва, мед öгырыс усяс сэтчö да пыр жö кусас. Сартас кутаныс — көрт бедь, вылісяньыс куим вожа. Сартас кутан көртсö тувъялöма пеша вор дорышас.

Пемдигөн сартассö суйлісны, топöдлісны вожъяс костас, кузь помсö öзылісны. Сартассö кө бура косьтöма, пешаыс этшаджык тшынöдліс<sup>5</sup>.

*Г. Попов серти*

**200 удж.** Содтав эмакывъяс динö кадакывъяс. Лöсьöд куим сёрникузя.

Кöч чеччалö, ...

Дзоридз быдмö, ...

Кыйсьысь вötчö, ...

Пыж шлывгö, ...





**201 удж.** Лосьод серпас сертиыс мойд, гиж. Сёрникузя-  
яссыыс визьнит кадакывъяссö.

1. Кодъяс олöны чомйын?
2. Кызди налы овсьö?
3. Мый вöчöны Петук да Ёж?
4. Кытчö мунö Лягушкаыс?
5. Мый вöчö Шыр – ичöt ныр?

**202 удж.** Содтав кадакывъяс дорö лöсялана эмакывъяс.  
Лосьод да гиж сёрникузяяс.

Матыстчас. Ньюжалісны. Локтöны. Шонтö.



**203 удж.** Лыдды сёрникузяссө. Торйөдөм кывъяс дорө сувтөд юалөмъяс.

1. Трактор вылын **уджавны** Вася заводитис дас класс помалөм бөрын. 2. Урокъяс бөрын колө **ворсыштны, котралыштны** ывла вылын. 3. Окота **лэбны** ставсьыс вылө, **видзөдлыны** Му шар вылө космоссянь.

**204 удж.** Гиж план сертияс висът сы йылысь, кутшөм вежсьөмъяс лооны ывлаын март төлысьын.

1. Март төлысьын лунъяс да войяс.
2. Шонді.
3. Туйяс.
4. Лым.

П ы р т в и с ь т а д к ы в ь я с : *нюжавны, дженьдаммыны, съөдөдны, шонтыны, чарөмавны.*

## **24 §. Кадакывъяслөн лыд серти вежласьөм.**

**205 удж.** Лыдды. Инды кадакывъяссө да сувтөд на дорө юалөмъяс.

Лэбач пукалө.  
Сьыланкыв юргө.  
Ю визувтө.

Лэбачьяс пукалоны.  
Сьыланкывъяс юргөны.  
Юяс визувтөны.



Мыйөн торьялоны медводдза да мөд столбикса кадакывъяссыс?

Кадакывъяс овлөны **өтка да уна лыдын**. Өтка лыда кадакыв петкөдлө өти предметлысь действие.

**Пример вылө.** *Лэбач пукалө.*

Уна лыда кадакыв петкөдлө кык либө некымын предметлысь действие.

**Пример вылө.** *Лэбачьяс пукалөны.*

**206 удж.** Вежлав кадакывъяслысь лыдсө. Лөсьөд уна лыда кадакывъяс пыртөмөн сёрникузяяс.

**Гиж тадзи.** *Вежөдө пу — вежөдөны пуяс. Тулысын пуяс мичаа вежөдөны.*

Жургө шор, дзользёны лэбачьяс, юргө сыланкыв, дзирдалө шондi, гажөдчөны йөз.

**207 удж.** Лыдды нөдкывъяссө да төдмав. Аддзы кадакывъяссө да висьтав налысь лыдсө.

1. Мича ныв пукалө пемыд керкаын, а көсаыс ывлаын.  
2. Китөм-коктөм, а рисуйтчө. 3. Төвнас узьө, а гожөмнас ызгө.

**\* 208 удж.** Лыдды да юрнимав. Веж кадакывъяслысь лыд формасө. Гиж найөс. Сет юалөм.

**Вөч тадзи:** *кыла (мый вөча?) — кылам (мый вөчам?), сатшкысьөма (мый вөчөма?) — сатшкысьөмаось (мый вөчөмаось?)*

Көнкө водзын<sup>1</sup>, кыла, тотшкөдчө сизь. Сувті, видзёда гөгөр. Сизьыд сатшкысьёма пипуё да съёлөмсяньыс клёнөдчө.

Мича, тшап лэбач. Юрыс да мышкуыс съёд, юр бөрас — гөрд чут, а съёд бордъяс вылас — еджыд визьяс.

Гыжъяснас<sup>3</sup> кутчысьёма пуё, мыджсьёма чорыд бөжнас да дугдывтөг тотшкөдчө ёсь нырнас. Буракө, гаг ли, пучой ли корсьё, кодъяс тшыкөдөны вөрсө. Оз өд прёста сійёс шуны вөrsa докторөн.

*С. Раевский*



1. Гөгөрвоёд, мый тайё текст.
2. Инды панассө, шөр юкөнсө, помсө.
3. Лыдды серпасалөм. Аддзы мөвпалөм юкөн.
4. Аддзы сёрникузяяс костысь йитөдъяс.

**209 удж.** Артмөд паныд вежөртаса кадакывъяс.

Лэччис — ..., мырддяс — ..., матыстчис — ..., лэптас — ..., сетісны — ..., садьмисны — ..., вайисны — ..., воча-видзисны — ... .



Уна лыд вылө индысь суффиксьяссө пасйы  $\wedge$  : сетісны.

**210 удж.** Артмөд сетөм кадакывъясысь өтка да уна лыда кадакывъяс.

Сёрнитны, пуксьыны, сывны, котравны.

Г и ж т а д з и. *Мый керис? Сёрнитіс, ...*

*Мый керисны? Сёрнитісны, ...*



**Сёрнитны** кадакыв дорө бөрйы матын вежөртаса кадакывъяс.

**211удж.** Сувтөд сетөм кадакывъяссö уна лыдö. Лöсялана эмакывъяс пыртöмөн думышт сёрникузяяс да гиж.

Сулалö, визувтö, нюмъялö, сералö, югъялö.

**212удж.** Лыдды, юрнимав. Скобкаын сетөм кадакывъяссö юалöмъяс отсöгөн сувтөд öтка либö уна лыдö.

Öтчыд Эля (корны) ёртъяссö<sup>3</sup> чужан лун пасйыны. Коля эз (тöдны), мый и козьнавны нывкалы. Гортас нин детинкалы<sup>3</sup> син улас (усьны) мича сера куд. Сэни мамыс гөрд сикötш (видзны). Сикötшыс (вöвны) зэв кузь, и Коля (мöвпыштны) вундыны сийöс. Сунис помыс вундигас (мынны) кисьыс, и сикötш мольяс кын турипув моз (гöгыльтчыны) пызан вылö, джоджö. Коля (уськөдчыны) чукötртны сикötш мольяссö, но бöрсö вöчны эз (кужны). Эз (мунны) и чужан лун вылö.

*В. Иванова серти*



1. Аддзы висьтлысь заводитчöм, шөр юкөн, помасьöм.
2. Лöсьöд текстыслы план да гиж изложение.
3. Вочаав гижöдтö сетөм тексткөд да донъяв асьтö.

## **25 §. Кадакывъяслөн кад серти вежласьöм.**

**213удж.** Лыдды. Сёрникузяясысь инды кадакывъяссö, сувтөд юалöмъяс. Мыйөн торъялöны кадакывъясыс?

Гриша помалис первой класс. Таво велöдчö мöд классын. Сийö помалас школа, мунас велöдчыны водзö.

Гриша мый керис? **Помалис** (первой класс). (Действие вöлі, помасис).

Гриша мый керö? **Велöдчö**. (Действие мунö öні.)


Гриша мый керас? **Помалас, мунасводзöвелöдчыны**. (Действиеыс оз на мун, абу на мунöма, кутас на мунны.)

Кадакыв вежласьö кад серти. Сійö овлö **öнія, колян да локтан када: сёрнитіс** — колян кад, **сёрнитö** — öнія кад, **сёрнитас** — локтан кад.

**\*214удж.** Лыдды текст, индав кадакывьяссö. Гиж торйөн öнія, локтан, колян када кадакывьяс. Аддзы уна лыда кадакывьяс, пасйы выліас *у.л.*

Рöмыд. Тувсов шонді саяліс вöртас сайö. Ме пукала лыс чомйын да юа чай. Друг ме весьтын мыйкö пондіс шувгыны. Думышти: уткаяс лэбöны. Видзöдлі: сідзи и эм. Сыктыв весьтті уліті лэбö утка кельöб. Со сійö кежис Кузьтыö да пуксис сэтчö шойччыны. На пиысь, гашкö, кодьяскö кольчасны татчö, кодьяскö лэбасны водзö.

*С. Раевский*

 **Кельöб** — тулыс-арын öта-мöд бöрся лунвылö лэбысь лэбач чукöр.

**Вöртас** — енэжтас, горизонт.




1. Гөгөрвоод, мый тайö текст.
2. Инды текст артмöдысь йитöдьяс.

**215 удж.** Артмөд сетөм кадакывъясысь колян, өнiя, локтан када кадакывъяс да гиж.

Разьсьыны. Куньсьыны. Шутьлявны. Узьсьыны.

Г и ж т а д з и. *Разьсьыны* — *разьсяс* — *разьсис* — *разьсьö*.

 Кызди гижсьöны орччөн сулалысь кык небыд согласнöя кывъяс?

## *26 §. Öнiя када кадакывъяс.*

**216 удж.** Лыдды да индав кадакывъяссö. Юалöмьяс серти тöдмав кадакывъяслысь кадсö.


### **Коми му.**

Коми му кузя ме муна,  
Гөгөр сулалö сьöd вөр.  
Вöрыс вывтi-вывтi уна,  
Сыысь унаыс оз төр.  
Аддза: сэнi шыльыд пожöм  
Вылö лэптö ассьыс юр.  
Сылы öткодь тöv кöть гожöм,  
Сэтшöм пуыс тайö бур.

*М. Лебедев*

М ö в п а в т а д з и:

*Мый Вöча?* Муна, ... — действие мунö öнi.

 Кызди колö гөгөрвоны «*Пожöм Вылö лэптö ассьыс юр*» сёрникузя?

Öнiя када кадакывъяс индöны, мый действиeыс мунö öнi, сёрнитiгас. *Гөгөр сулалö сьöd вөр.*

**217 удж.** Содтав эмакывъяс дорö öнiя када кадакывъяс да гиж сёрникузяяс.

Вөр. Челядь. Шор. Самолёт.

Г и ж т а д з и. *Вөр сулалö, шувгö, быдмö.*

Öнiя кад петкöдлысьсö -а, -а(н), -ö кыв вежлалан суффиксьясөн: *видзöд<sup>а</sup>, видзöд<sup>ан</sup>, видзöд<sup>ö</sup>.*

**218 удж.** Висьтав, кор да кодлы шуан «видза оланныд», «чолöм», «здорово». Аддзы налы öтвужъя кывъяс сетöмъяс пиысь.

Дзоньвидзалун, видзчысьны, видзöдны, видзöм, видза колянныд, чолöмавны.

**?** Лöсьöd нимлунön чолöмалан гижöd аслад мамыдлы (батыдлы, вокыдлы, ёртыдлы).

**219 удж.** Лöсьöd сетöм кывтэчасъяс отсөгön висьт «Походö» тема вылö.

Зiля лöсьödчö. Дасътöны коланторъяс. Ёна тöждысьö. Сылысь кывзысьöны. Мунöны медводдзаысь. Шойччисны бура. Дыр казътыласны.

**220 удж.** Лыдды өнiя када кадакывъяс содталөмөн.

### **Зиль лэбачьяс.**

Сизьös ... вöрса докторөн. Сийö асывсянь да рытöдз ён нырнас ... пуö, ... гагъясös.

Вöрын олысь лэбачьяс пиысь королёк медся ичöt. ... сийö некымын грамм. Дарём ичöt, а сёйны ён. Во чöжөн вөръясысь ... миллионысь унджык гагйös да пучöйös, ... пучсös висьмöмысь.

А визув пыста ... град выв пуктасяс. Луннас сийö ... уна сё гаг.

Отсöг вылö кывъяс *бырöдö, видзö, веситö, шуöны, клёнгö, корсьысьö.*

**221 удж.** Гиж сочинение «Лэбачьяс — вөр-ва видзысьяс» тема вылö.

П л а н.

1. Кутшöм лэбачьяс бырöдöны пу кырсь улысь гагъясös?
2. Кутшöм лэбачьяс сёйöны град выв пуктасяс вылысь гагъясös да лельöясös?
3. Кызди тi тöждысянныд лэбачьяс вöсна?



Визьнит сочинениесьыд öнiя када кадакывъяс.



## *27 §. Локтан када кадакывъяс.*

**222 удж.** Лыдды. Инды кадакывъяссö да сувтöд юалöмъяс.

Мед дзирдалас шондi!  
Мед югъялас луныс!  
Мед дзоридзöн тырас  
Да нюмъялас му!

*М. Лебедев*

*Мый керас? Дзирдалас, югъялас, тырас, нюмъялас.*

Локтан када кадакывъяс петкöдлöны, мый действиеыс кутас на мунны, лоас на.

*Мед дзирдалас шондi!*

*Мед югъялас луныс!*

**223 удж.** Гиж сёрникузяяссö. Визьнит локтан када кадакывъяссö, выліас пасйы *ö.л.* либö *у.л.*

Помасясны урокъяс, и ми ставöн мунам сиктса клубö. Сэтчö локтасны и коймöд класса велöдчысьяс. Сэни лоас том серпасасысьяслөн выставка. Миян классын медся бура рисуйтчö Ваня. Сійö велöдчас да лоас серпасасысьён.

**224 удж.** Лыдды. Индав кадакывъяссö да сувтöд юалöмъяс.

Быдмöй, велöдчöй да бөрйöй!  
Сьölöм серти удж.

Кужой лыддысьны и гөрны,  
Радейтны бур мудз.  
Петас тиянысь<sup>3</sup> учёной,  
Врач и инженер...

*С. Попов*

**225 удж.** Помав висьтсö локтан када кадакывъяс  
пыртöмөн.

### **Кодөн ме лоа.**

Быд мортлөн ичотсяныс эм көсйём. Кор ме быдма,  
помала школа, муна ...

**226 удж.** Гиж, скобкаын сетём кадакывъяссö веж лок-  
тан кадаён. Висьтав, кутшём юалём лёсялö локтан када  
кадакывъяслы.

### **Мыйён көсья лоны.**

Думайта **сы йылысь,**  
Мыйён лоны мем.

Уна югыд туй вож

**Миян водзын эм.**

Позьö лоны врачён —

Быдёнсянь почёт.

(Лэбзыны) небесаö,

(Лоны кө) пилот.

*В. Ширяев серти*



1. Висьтав гижанногсö торйөдём кывъяслысь.

2. Гөгөрвоод да гиж шусьөгсö:

*Уджыд морттö мичмөдö.*

## 28 §. Колян када кадакывъяс.

**227удж.** Гиж сёрникузяссö. Торйöдöм кадакывъяс дорö сувтöд юалöм.

Миян школаын эм юннатъяслөн кружок. Школаса теплицын юннатъяс **быдтісны** дзоридзьяслысь<sup>2</sup> рöсада. Шондöдöм бöрын найö **садитісны** рöсасасö клумбаяс вылö. Клумбаяс лöсьöдісны быд керка дорö.

*Мый керисны? Быдтісны, садитісны.*

Колян када кадакывъяс петкөдлöны, мый действиеыс мунöма нин. *Воис тулыс. Сыліс лым, мычысис веж турун.*

**228 удж.** Лыдды да юрнимав текстсö. Гиж тöдчöдöм кадакывъяссö колян кад вылö вежöмөн.

Сыктывкарын эм юннатъяслөн станция. Татчö **воylvлöны** карса челядь. Найö **велöдчöны** быдтыны, дöзьöритны быд-мөгъяс. Со öграда бокас **пашкыртчöны** кызьяс, акацияс, льöм пуяс, сэтөр кустьяс. Тулысын клумба вылас мичаа **дзоридзалöны** тюльпаньяс. Гожöмнас градьяс вылын **быд-мöны** капуста да тыква, теплицаясын **сöвмöны** öгурцы да помидор.



Коді сійö юннатыс?

Колян кад петкөдлысьсö кадакывлөн кыв вежлалан **-и (-і)** суффикс отсöгөн: *(ме) Видзи, котöрті, (тэ) Видзин, котöртін, (сійö) Видзис, котöртіс.*

**229 удж.** Содтав тэчаса эмакывъяс дорö колян када кадакывъяс, лосьöд сёрникузяяс да гиж.

Сьöлаоз. Турипув. Катшасин. Мырпом.

**230 удж.** Лыдды аттьöалан письмö.

### **Дона «Би кинь»!**

Гижö тэныд Изьва районсянь Люда Терентьева. Ме тэнö аттьöала, мый миянлы, кык чойлы да нöшта Ксюша Каневалы, Юля Рочевалы козыналін путёвкаяс Сьöд саридз дорö.

Лагерын миянлы ставыс кажитчис. Сэні ми медводдзаясь аддзим розаяс, пальмаяс, яблоньяс. Рытнас тані лэбалö зэв уна светлячок.

Луннас кыкысь миянös новлödлісны саридз дорö купайтчыны да гожйödчыны, нуödлісны гöра вылö.

Вöлісны лагерын гажа концертъяс да дискотекаяс. Öтчид ми петкөдлім сценка, сьылім частушкаяс, таысь миянлы сетісны<sup>3</sup> тасьтi тыр оз. Тöдмасим мукöд челядькөд.

Вот татшöм кыпид да интереснöй вöлі лунвылö ветлöм.

*Люда Терентьева, Сизяб сикт, Изьва район.*



Гиж аттьöалан письмö татшöм план серти:

1. Чолöмасьöм.
2. Ас йывсьыд висьталöм.
3. Аттьöасьöм, мыйысь аттьöалан.
4. Кыпид лоөмтор йылысь юөртöм.



**231 удж.** Кутшөм мойдкыв дорё лөсялө серпасыс?  
Лөсьод мойд колян када кадакывъяс пыртөмөн.

**232 удж.** Гиж сёрникузяссө. Содтав колана шыпасъяс.  
Торйөдөм кывъяслысь висътав гижанногсө.


Котөрөн **пыр...с** клубö Сеня **Пыст...н** да **горөд...с**:

— Яков, Пургаыд воис гортö!

— Ура! — воча горөд...с Лена, а сы бöрын кут...сны  
горзыны и мукöдыс.

Челядь<sup>3</sup> тöдiсны: воисны кö пон...яс, матынöсь бат...яс,  
вöралыс...яслөн бригада.


Со и вöралысьяс тыдовтчисны<sup>3</sup>.

 Аддзы кадакывъяс, тöдмав лыдсö да кадсö, пасйы кыв  
вылиас.


**233 удж.** Лыдды да бөрйы вежортас сертиыс лөсялана кывъяс да кывтэчасъяс.

ылөдлыны  
пывсьыны  
скөрми  
повзи  
вошис  
кынми


бытьё му пырыс муніс  
вирөй пузис  
лысьём небзьөдны  
юрси сувтіс  
ныр йывті новлөдлыны  
ки ни кок ог кыв

 Гиж колян када кадакывъяссө налы лөсялысь зумыд кыв-тэчасъяскөд. Инды колян кад петкөдлысь суффиксъяссө.

В о ч т а д з и.

Кынми  — ки ни кок ог кыв

**234 удж.** Артмөд **-ышт** суффикс отсөгөн кадакывъяс. Инды кыввужсө да суффиксъяссө.

В о ч т а д з и. Корис —  корыштіс

Босьтіс, колис, вежис, тэчис, дөмин, ворсін.

1. Висьтав, торъялөны-ө кадакывъясыс да мыйөн.
2. Вайөд паныд вежортаса кадакывъяс **котөрөн, пырис, матынось, тыдовтчыны** кывъяслы. Лөсьөд сёрникузяяс, гиж да визьнит кадакывъяссө.

## Төдөмлун вынсьөдөм вылө уджъяс.

1. Мый петкөдлө кадакыв?
2. Кутшөм кадын вермөны сулавны кадакывъяс?
3. Мыйөн торъялөны өтка да уна лыда кадакывъяс?

**\* 235 удж.** Аддзы быд кывчукөрысь лөсявтөм кадакыв. Подулав.

1. Аддза, видзөдіс, чөсмасям, дзоръялө.
2. Майшасьө, шогсьө, радлө, котөртө.
3. Зэрө, рөмдө, пемдө, югдас.
4. Чужө, сзьемө, кымөртчө, вощьө.
5. Куртан, зорөдалі, ытшам, турунасям.
6. Чышка, пөжала, ломтам, мыськала.
7. Вошти, нуөдім, вердім, колльөдім.

**236 удж.** Лыдды, текстсө юрнимав. Төдмав текстлысь сикассө (юөртана, мөвпалана, серпаса).

Фёдор Васильевич Щербаков чужліс 1914 воын Турья сиктын. Война кадө тышкасис фашистьяскөд. Ранитчөм да бурдөдчөм бөрын воис гортас. Уджалис школаын, газетын, небөг лэдзанинын, радиоын. Фёдор Васильевич гижис кыв-бурьяс. Уна кывбур лои сьыланкывйөн. Сылысь сьыланкывъ-яссө ёна радейтөны да сьылөны коми войтыр. Öти бөрся мөд петалисны сылөн небөгъяс. Уна гижөд лои вуджөдөма роч кыв вылө. *В. Тимин серти*

**?** 1. Аддзы да гиж мыджсяна (опорной) кывъяс. На отсөгөн дасьтысь текстсө висътавны небөгө видзөдтөг.

**237 удж.** Лыдды. Инды кадакывъяссö, пукты на дорö юалöм, висътав налысь лыдсö да кадсö.

### Кизьяс йылысь.

Дас — дас öтиöд нэмын вылысь паськöм кизявлісны бронза, эзысь, лы да пу кизьясөн. Кизь пыдди вурлісны и сикötш мольяс. Пöшти став кизысь вöлі пыса. Вöліны гöгрöс, кык йыла, пласта либö гöгрöстöм юра кизьяс. Сэкся эзысь кизьяс пöвстын паныдасьлöны серöдöмъяса, а пу кизьяс öнیا кодьöсь вөлöмаöсь — розя шöра гöгыльяс.

**238 удж.** Лыдды текстсö, юрнимав.

Чери эз кут шедны, и пукавны вадорын вöлі **весьшөрö**. Чукöрті кыйсян кöлуйöс да мөдöдчи гортлань.

Тöдлытöг **асыв-войвывсянь** тыдовтчис кымөр пласт да öдйö кутіс кайны енэж шөрлань. Сійö вочасөн пыр паськаліс да лөзöдіс. Шуштöм лои сьölöм вылын.

Воа ог эськö гортö зэрöдзис? **Öддзöді** воськовъясöс. Но кымөрыд локтіс нöшта на öдйöджык. Кутіс нин **чардавны-гымавны**. Вылісянь мөдöдчисны гырысь зэр войгыяс.

Удиті воны сöмын пипу **рас весьтöдз**. Зэрсыйс дзесыны вöлі некытчö. Дзикöдз кötасьöмөн вои гортöдз.

*И. Белых серти*

**?** 1. Кыдзи колö гөгөрвоны «пукавны вöлі весьшөрö», «шуштöм лои»?

2. Гөгөрвоöd торйöдöм кывъяслысь гижанногсö.

3. Лөсьöдчы да план серти гиж изложение.

П л а н.

1. Мөдöдчи гортлань. 2. Тыдовтчис кымөр. 3. Воа ог зэрöдзис? 4. Гортö вои кötасьöмөн.



## 29 §. Кывберд.

**239 удж.** Висьтав, кутшөм юалөм вылө вочавидзöны признак (тöдмös) петкöдлысь нимъяс.

**Кос** турун, ...

**Курыд** лук, ...

**Гöрд** оз, ...


Предметлысь признак петкöдлысь кывъяс шусьöны **кыв-бердъясөн**. Найö мичмöдöны, стöчмöдöны петкöдланторсö. Кывбердъяс вочавидзöны *кутшөм?* юалөм вылө.

*Мича лун. Веськыд туй. Чöскыд öмидз.*

**240 удж.** Гиж. Аддзы да визьнит кывбердъяссö.

Помасис март тöлысь. Лунъясыс кузяммисны. Пыдöстөм лöз енэжыс сöстөм, быттьö ваөн мыссьöма. Водз садьмö мам кодь мелі шонді. Сявкнитас ассьыс лышкыд югөръяссö вөр-ва пасьта да тэрмасьтöг заводитас шлывгыны тöдса туйöд. Быдлаö инмывлö сылөн пöсь кывйыс.

*И. Коданёв серти*

 Кут вежöрад **быттьö, мыссьö** кывъяслысь гижанногсö.


**241 удж.** Висьтав, кутшөм признакъяс петкöдлöны кыв-бердъясыс.

Гöгрös шар. Ичöt шор. Юмов сакар. Шома ырöш.

Кывбердъяс петкөдлөны предметлысь рөм, көр, ыджда, форма.


**242 удж.** Гиж сёрникузяссө, визьнит кывбердъяссө.

1. Югыд<sup>5</sup> лун-вой быри,  
Сыліс еджыд лым.
2. Бара тулыс воис —  
Кыпыд, гажа кад.

 Лыдды текстсө кык ног: стөч тадзи, сэсся лыдды кывбердъястөгыс. Кутшөм торъялөм төдчө?

**243 удж.** Содтав эмакывъяс дорас рөм да ыджда петкөдлысь кывбердъяс да гиж.

Кымөр. Турун. Чери. Ниа. Пон. Кань.

 Артмөм кывтэчасъяснас лосьөд кык-куим сёрникузя.

**244 удж.** Лыдды кывбурсө, сэсся гиж кывбердъяссө эмакывъяскөд.

**Ми пөжасям.**

Мамө талун няньшом<sup>5</sup> вөчис,  
Пуктіс лым кодъ еджыд пызь<sup>5</sup>.  
Мамө вөчө вөсни сөчөн,  
А ме тэча нөкъя рысь.  
Өдъя пачным регыд ваймас,

Локтö пöжасьны нин кад.  
Рыська шаньга бура банъяс,  
Чöскыд няньлы быдөн рад.

*С. Куликов*



1. Аддзы кывбурысь тэчаса (сложной) эмакыв, гөгөрвоод гижанногсö правилö серти.

**245 удж.** Вайöd öткодь кыввужъя кывъяс, мед найö вöлісны 1) эмакывйөн, 2) кывбердөн, 3) кадакывйөн.

В ö ч т а д з и. Вөр — 1) вöраин, вөртор; 2) вöра (места), вөртöм, вöрса; 3) вöравны.

Тшак, сөй, вуджөр, турун.

**246 удж.** Вайöd кывбердъяслы паныд вежöртаса кывъяс да гиж.

Шоныд, ыджыд, ляпкыд, еджыд, вöсньыд, курыд.



Лöсьöd абу тыр признака кывбердъяс -ов, -ик суффиксьясөн.

**247 удж.** Гиж. Чутьяс местаас содтав лöсялана кывбердъяс.

### **Сьöдбöж.**

Сьöдбöж — ... куа ... звер. Сійö ... да ... . Видзöдлан кö кок туй вылас, шензян сылөн пельклун вылö. То вöчалö петляяс, то пыралö увтасинö, то суныштлиö ... лым пиö. Тадзи сійö корсьö шыръясöс. Сылы оз мешайт ни ... лым, ни ... поводдя.

Отсөг вылө кывъяс: *Вөрса, сюсь, пельк, пушyd, джуджyd, кöдзыд, небыд.*



Пасйы кадакывъяслысь кадсö (ö.к., л.к., к.к.)

**248 удж.** Гиж. Чутьяс пыдди содтав лöсялана кывбердъяс.

... шондi улын рама шывгö увлань ... Эжва ю. ... юас видзöдчöны ... и ... сиктъяс, ... видзъяс, ... и ... пуяс. Эжва юыс век медся мича да дона коми мортлы.

Отсөг вылө кывъяс: *гожся, паськyd, лöнь, посни, гырысь, туруна, лыска, корья.*



Лöсьöд кык-куим сёрникузя чужан сикт дортıyd визувтысь ю йылысь, пырт кывбердъяс.

**249 удж.** Бөрйы сетöм эмакывъяслы лöсялана признак нимъяс, мед петкöдлісны рöм, ыджда, форма, көр.

Мач, сёркни, кушман, льöм.

**250 удж.** Лыдды. Гиж кывбердъяссö эмакывъяскöд.

### **Кыдзи дöзьöритны кроликъяссö.**

Кроликъяс радейтöны<sup>3</sup> уна сикас сёян: бобöнянь, бадь корьяс, капуста, свеклö, зөр, ид, кукуруза, морков, сов, мел. Тöv кежлö налы колö **заптыны** турун. Колö бура видзöдны, мед турун пытшкас эз веськав мак, лук либö чеснок. Оз позь ёна вердны и уль<sup>3</sup> турунön. Кузь пеляяс вермасны **висьмыны**.

Гырысь кроликъясӧс луннас колӧ вердны куимысь. Асыв-нас да рытнас **позьӧсетны** кос турун, ид либӧ зӧр, а луннас град выв пуктасъяс. Сов да мел колӧ **видзны** торъя дозйын. Пемӧсьяслы юны сетӧны шоныд сӧстӧм ва.



Сувтӧд юалӧм торйӧдӧм кадакывъяслы?

**251 удж.** Гиж, чутъяс пыддиыс содтав колана кывбердъяс.

### **Бузгӧны шоръяс.**

Азыма сӧйӧ<sup>3</sup> ... лымсӧ ... шонді. Варова бузгӧны ... шоръяс. Воис зэв ... кад видз-му овмӧсса уджалысьяслы. Лунысь-лун пыр ёнджыка шонтӧ мусӧ ... шонді. Сюся колӧ видзӧдны му сылӧм бӧрся, медым тӧдны, кутшӧм му вылӧ петны медводз гӧрны-кӧдзны.

Отсӧг вылӧ кывъяс: *руд, тувсов, ичӧтик, пӧсь, ярьюгыд.*

**252 удж.** Лӧсьӧд кывъя серпас гажа тувсовъя лун йылысь. Гиж сочинение, пырт сэтчӧ артмӧм серпастӧ.

Отсӧг вылӧ кывъяс: *кымӧртӧм енэж, югыд шонді, пӧльтӧ небыд тӧв, пуяс вежӧдӧны, сӧстӧм сынӧд, дзользьӧны лэбачьяс.*

### 30 §. Сёрникузя. Юөртана сёрникузя.

**253 удж.** Лыдды. Мыйла сёрникузяяс помö сувтöдöма чут? Кутшöм тайö сёрникузяяс?

Тундраö петан тувсовъя луныс торъя нин шызьöдiс детинкаöс. Водз асылын разисны чомнысö, тэчисны додьяс вылö да крепыда көртавлiсны гезйөн. Сэсса стадаыслөн таллялём ворга кузя аргышъяс гулыд ягысь лэччисны Печора вылö да сувтiсны Трöш сикт горулö. Пастукъяс водзö вöтлiсны стадасö ю кузя, джуджыд лымйöд. Собисны медводзын вына менурейяс — мича, ён көръяс.

*Е. Рочев серти*



*Аргыш — сьöрсьён-бöрсьён мунысь вит-ö-квайт көр додь.*

Сёрникузя, көнi мый йылысь кө висьтавьсö, шусьö юөртанаөн.

Гижигөн юөртана сёрникузя помын сувтöдсьö чут.

**254 удж.** Лöсьöд сетöм кывъясысь сёрникузяяс да гиж.

Сиктын, гöра-кöдза, лöсьöдчöны, тувсовъя, важöнкoдь, кeжлö, нин.

Дзоньтавны, тракторъяс, öдйö, помалiсны, машинаяс, да. Петкöдöма, муяс вылö, удобрение, тырмымөн, лои.

Бур, дасьтöма, көйдысьяс.

Тырмö, уджыд, тулысын, майбыр.

### 31 §. Юалана сёрникузя.

**255 удж.** Лыдды сёрникузяссö гөлöс вежлалöмөн.

**Коді** тиянös, челядь, медся ёна радейтö?

**Коді** тиян дорö медся мелі?

Тиян дона мамныд!



1. Кутшöм пас сувтöдöма сёрникузяяс помö? Мыйла?
2. Мыйön торьялöны первой кык сёрникузяыс бөрьясыс?

Сёрникузя, кöні мый йылысь кö юавсьö, шусьö **юаланаөн**. Юалана сёрникузя помын колö сувтöдны юалан пас.

**256 удж.** Лöсьöд серпас серти юортана да юалана сёрникузяяс, мед артмис висьт челядьлөн удж йылысь. Висьтсö гиж.





Вочавидз татшөм юалөмъяс вылө:

1. Кутшөм сёрникузя помө сувтөдсьө чут?
2. Кутшөм сёрникузя помө колө сувтөдны юалан пас?

**257 удж.** Лыдды юалөмъяссө да вочавидз на вылө. Петкөдлы гөлөснад юалөмсө да воча кывсө.

1. Кымынөд классын тэ велөдчан?
2. Кутшөм тиян классныд?
3. Кызди шуоны тиянлысь велөдысьтө?
4. Мыйла перемена дырйи колө петавны классысь?

**258 удж.** Лыдды быд сёрникузя төдчана кыв вылө логическөй ударение вөчөмөн: первойсө — кызди юалана сёрникузя, мөдысьсө — кызди юөртана.

Талун ті классын дежурнөйяс

Локтанныд школаө мукөдсьыс водзджык

Лөсьөданныд ставсө велөдысь вотөдз

Урокъяс бөрын лоө коми гижысьяскөд аддзысьлөм

**259 удж.** Лөсьөд өта-мөд костса сёрни «Чери кыйигөн» тема вылө. Пырт юалана сёрникузяс.

**260 удж.** Лыдды висьтсө да инды сэтысь юалана сёрникузяс.

### **Геня да Вася.**

Геня чеччис, тэрмасьөмөн мыссис да муніс Серукөс колльөдны. Гортас бөрсө локтигөн Геня аддзис шор дорысь төдтөм<sup>3</sup> детинкаөс да юалис:



- Кытысь тэ?
- Көр дорысь.
- А мыйла тані?
- Велөдчыны вайисны.
- Велөдчыны? Ме тані велөдчыны жö кута.

*Я. Рочев серти*



1. Кыдзи колö лыддыны юалана сёрникузяс?
2. Гиж висьтсьыс юалөмъяссö да вочавидзөмъяссö.



*Көр дорысь — көръяс Видзанинысь.*

**261 удж.** Лыдды шмоньсö колана ногөн.

Öньöös другьясыс чуксалöны ворсны, а сийö пыксьö:

— Ог эшты! Талун ме батылы зэв ёна кола. Некытчö эз тшöкты мунны.

— Мый лои? — чуймисны зонкаяс.

— Сийö көсийö нуөдлыны менö парикмахерскöйö.



1. Гөгөрвоөд, кыдзи артмö шмоньыс.

2. Гиж юалана сёрникузясö.

**262 удж.** Лыдды. Торйөдөм кывъяс дорö юалөмъяс сүвтөдөмөн артмөд сёрникузяс. Юалана сёрникузяссьö гиж.

*Г и ж т а д з и. Лёсьыдось тундраса войяс!*

*Кутшөмось тундраса войяс?*

**Лёсьыдось** тундраса гожся войяс! **Шондйыс** тані некор оз саявлы. Сынöдыс лунся дорысь ыркыд. **Тундра шöрын**

тыдалоны мича мылькъяс. На весьтти кытшлалоны **дзодзөг чукөръяс. Бадьяс костын** герчкёны гордаяс.

И ывлалён мичлуныс, и лэбачьяслён сьылёмыс — ставыс чуксалё овны.

*Я. Рочев серти*

 *Гордаяс — уткаяс.*

**263 удж.** Вочавидз юалёмьяс вылө гижёмөн. Гижигён вөдитчы веськыдыв столбикса кывъясөн.

Кытчө чукөртчисны челядь?

Мый шуисны весавны найö?

Коді медводз локтіс?

Коді бригадираліс?

Кыдзи уджалісны челядь?

Кор найö помалісны уджсö?

Вера

школа дорö

өбедөдз

сійö

школа йөр

бура

**264 удж.** Лöсьöd серпас серти да гиж куим-нёлъ юорта-на сёрникузя. Серпаслы сет ним.



**265 удж.** Гиж. Сёрникузяяс помö сувтöд колана пасьяс.

**Тундралөн** эм аслас мичлун<sup>3</sup> Көнi ещö эмöсь **сэтшöм** паськыд **эрдъясыс** Көнi сы мында пöткаыс Гөгöр видзöдлан да быттö выныд содö



1. Инды торйöдöм кывъясысь чорыд согласнöйяссö.
2. Инды куим слога кывъяс. Кутшöм кывъясын слогьяс вылö юклöмыс оз лöсяв вуджöдöм вылö юклöмкöд?

### **32 §. Горöдана сёрникузя.**

**266 удж.** Лыдды сёрникузяяссö, торйöдöм кывъяс шуигөн гөлöстö ыдждöдышт.

1. Кутшöм **муса** ас чужан муöй! 2. Мед **сöвмас** сийö лунысь-лун! 3. **Дзирдав** тэ да **радуйтчы**, коми парма вöр!



Висьтав, мый петкöдлö первой сёрникузяыс. Мöдыс? Коймöдыс?

Сёрникузя, көнi петкöдлысьсö радлöм, нимкодясьöм, шензьöм, повзьöм, сьölöмкылöмөн көсьöм корöм, тшöктöм, шусьö **горöданаөн**.

Сёрникузя помас сувтöдсьö горöдан пас.

**267 удж.** Лыдды горöдана сёрникузяяссö да висьтав, мый найö петкöдлöны.

1. Кутшөм дона тэ мен, Коми муёй!
2. Велөдчөй, челядь, югдөдөй юр,  
Велөдчөм вайё тиянлы бур!
3. О! Кутшөма повзьөдін менө!

**268 удж.** Думышт горөдана сёрникузяяс, мед найё петкөдласны шензьөм, радлөм, повзьөм, тшөктөм.

Г и ж т а д з и.


*Аттө, юыс кутшөм паськыд! (Шензьөм.)*

*Ой, кутшөма чардыштіс! (Повзьөм.)*

**269 удж.** Лыдды. Гиж да сувтөдав сёрникузяяс помө колана пасьяс.

Лөсьыд да гажа лэдзавны тувсовъя шорьясөд кабалаысь вөчөм пыжъяс

Юра вөчис чорыд кабалаысь пыж Кутшөм сійө артмис мича, ён, крепыд Колө дзик пыр мөдөдны сійөс ылі туйө.

 Төдмав вежлөгсө медводдза сёрникузяын сулалысь эмакывьяслысь.

**270 удж.** Лыдды, а сэсся гиж. Висьтав, кутшөм тані сёрникузяяс.

Кутшөм нин кос да югыд, да кыпыд тані! Сэтшөм нин сөстөм еджыд яла вылын сулалысь пожөмъяс пөвстас! И шондіа луннад сэтшөм кокниа-чөскыда лолавсьө морөс тырнад! И весиг югыд олөмыс быттьө мусаджыкөн лолө!

*И. Торопов*

**271 удж.** Лыдды мичаа, гөлөстө вежлалөмөн. Кутшөм сёрникузясысь артмөма текстыс?

**Рака.**

Вөр пасьтала | горзис рака: ||

— Зептысь гусялісны сакар! || Яблөг! || Кампет! ||

Өмидз тусь зептысь пышйөдөма сюзь. ||

— Дугды, | рака, | зык эн лэпты. ||

Тэнад весиг | абу зептыд. ||

— Кызди абу? || Эг өд дзед! ||

Ой-ой! || Гусялөмны зеп! ||

*П. Бушенев*

**272 удж.** Лыдды. Докажит, мый тайө текст. Инды текст торкөм.

Челядь ворсисны ывлаын. Öтияс скакалкаөн чеччалөны, мөдьяс мач чужьялөны, коймөдьяс велосипедөн голлясьөны.

Ичөтик Лиза сулаліс дзирья дорын да сюся видзөдіс челядь бөрся. Сійө төрыт на воис мамыскөд карысь, да сиктса челядь вөлісны төдтөмөсь на.

Но со Маша нима нывка казяліс бокин сулалысь карса гөстяөс да чукөстіс өтлаын нывкаяскөд ворсыштны. Керка водзын быдмө льөм пу.

Регыд мысти Лиза төдмасис сиктса челядькөд.

**?** Лыдды выльысь гөлөстө вежлалөмөн, петкөдлы логической ударение.

**273 удж.** Лыдды выразительнöя да висътав сурöссö.

### **Тулысын.**

Гөгөр лөнъ. Пыжөн ю кузя кывта. Дугдывтöг дзуртöны пелысъяс. Енэжсянь юр весьтö öшйöма съод кымөр. Друг быттьö кыліс дзодзöгъяслөн горзём. Ме дугді сынны. А гашкö, абу дзодзöгьяс? Кутшём шы нö эськö кылö?

Вочасөн ёнмёмөн зерны пондіс. Ковмис петны берегö. Друг аддзи дзодзöгьясöс. Найö быттьö веськыда ме вылö лэбисны. Но и повтёмось найö!

*И. Коданёв серти*



Гиж юортана, юалана, сэсся горöдана сёрникузяяс.

**274 удж.** Лыдды. Инды горöдана сёрникузяяссö.

### **Асыв.**

Чеччы, Маша, садьмис важөн

Югыд<sup>3</sup> шонді, асыв сэзь!

Петав, Маша, мөстö вашöd,

Баляясöс гидысь<sup>3</sup> лэдз!

Чеччы, Маша, дзоридз этшön<sup>1</sup>

Синтö восьты, пальöd ун,

Узьны войнас бара эштан,—

Видзöd, юзьö гажа лун!

*3. Шиликова*



*Дзоридз этшön — дзоридз моз.*

*Вашöd (вашödны) — вötлы (вötлыны).*

### 33 §. Подувпас.

Быд сёрникузяын эмось шөр, сюрёса кывъяс.

Тайо **подувпас** да юөрпас.

Подувпас петкөдлө, код йылысь либө мый йылысь висътавсьö сёрникузяын. Подувпас вочавидзö **кодi? мый?** юалёмъяс вылө. Подувпассö сёрникузяын колö визьнитны öти визьөн: *Бать öдйö пестiс бипур да öшöдiс пöрт.*

Лыдды серпасъяс увсъис сёрникузяяссö.



Нывка лыддö небöг.

*Кодi* лыддö небöгсö?

*Код йылысь* висътавсьö сёрникузяяс?

Пызан вылын куйлö тетрадь.

*Мый* куйлö пызан вылын?

*Мый йылысь* висътавсьö сёрникузяяс?

**Нывка** да **тетрадь** кывъяс — **подувпасъяс**.

**275 удж.** Лыдды да висътав, код йылысь либө мый йылысь мунö сёрниыс быд сёрникузяын.

1. Шонді дзирдалө. 2. Лэбачьяс дзолъзёны. 3. Пуяс зымвидзёны. 4. Төв пөльтө.



1. Сувтөд подувпас динө юалөмьяс.
2. Инды торйөдөм кывьясысь параа чорыд согласнойяс.

**276удж.** Гиж да быд сёрникузяысь визьнит подувпассө.

Воис асыв. Шонді койö югөрьяссө видзьяс вылө. Тэ пукалан ю дорын. Чужөмтө гильөдө небыдик төв. Ссылöны лэбачьяс. Сьөлөмыд радлө.



Аддзы текстысь э шыпаса кывьяс. Кутшөм согласнойяс бöрын гижсьö э шыпас?

**277удж.** Лыдды. Сёрникузяысысь инды подувпасьяссө, висътав, кутшөм кывсикасөн петкөдлөма.

**Шоныд зэрысь раскын садьмис став ловьяыс.**  
Кыдзьяс вылын потісны гарьясыс. Мыччысисны нэриник веж корьяс. Му вылас чургөдчис веж турун. Сійö вевттис кольөм вося важ корьяссө, пөрөм дзор турунсө, чегьясьөм посни увьяссө. Сэсса петісны кутшөмсюрө дзоридзьяс. Раскыс ловзис, кыпыда лолыштис. Лоис сэні сөстөм, югыд.

*С. Раевский серти*



Төдчөдөм сёрникузяса эмакывьяслысь төдмав вежлөгьяссө.

**278удж.** Гиж. Чутьяс пыддиыс содтав веськыдладорсыс лөсялана подувпасьяс.



## Асья вöрын.

Асья ... ярьюгыда ломзис да югдöдiс вöрсö. Югыд ... заводитiсны бледмыны да вочасöн кусны. А петысь шондiлөн ... гажöдiсны вөр йыв. Ю вывсянь öвтыштiс ... . Кызьяс да пипуяс вылын сьялöдчыштöны-ворсöны ... . Шондi югөрьяс улын дзирдалiсны лысва ... . Пуяс вылын сьылiсны вöрса ... .

кыаыс  
югөрьясыс  
кодзувьяс  
корьяс  
войтьяс  
тöвру  
лэбачьяс



1. Инды тэчаса (сложнöй) кывьяс, гөгөрвоод гижанногсö.

2. Веж матын вежöртаса кывьясөн.

Öвтыштiс — ...

Дзирдалiсны — ...

Сьылiсны — ...

**279 удж.** Лöсьöд да гиж сёрникузяяс, медым сетöм нимвежтасьясыс вöлины подувпасьясөн.

Сийö. Найö. Ми. Тэ.

Г и ж т а д з и. *Тэ бура ворсан шахматөн.*

**280 удж.** Лöсьöд сёрникузяяс, медым сетöм эмакывьясыс вöлины подувпасьясөн.

Кыз. Пелысь. Бушков. Вöралысь.

Г и ж т а д з и. *Лымья эрд вылын сулалiс еджыд кока кыз.*

### 34 §. Юөрпас.

**281 удж.** Лыдды сёрникузяссө.

Бөрө **коли** төв. Мича паськөмөн **пасьтасис** вөр.



1. Инды сёрникузясысь подувассө.

2. Мый висьтавьсө төв йылысь, вөр йылысь?

**Коли** да **пасьтасис** кывъяс — **юөрпасьяс**.

Юөрпас петкөдлө, мый керө, вөчө петкөдлан предметыс — подувасыс. Юөрпассө сёрникузяын колө визьнитны кык визьён.

**Подувпас** да **юөрпас** сёрникузяын — сюрөса юкөдъяс.

Мукөд кывъясыс шусьёны содтана юкөдъясөн.

Шонді мыччысис кымөр сайысь.

**282 удж.** Гиж. Визьнит сёрникузясысь юөрпасьяссө.

Ывла вылын сулалө мича гожся<sup>2</sup> поводдя. Югыз шонді меліа нюмъялө, койө пось югөрьяссө му вылө. Пөльтө небыдик<sup>3</sup> төвру. Гөгөр чөв, лөнь.

**283 удж.** Төдмав нөдкывъяссө. Юалөмьяс отсөгөн аддзы юөрпасьяссө.

1. Лудысь аддза тась да сэтысь —

Ветлөдлөны пась да кепысь.

2. Ён, но оз вöч уджтö.  
Оз вись, а век ружтö.
3. Гыжъяс ёсьöсь, ускыс кузь<sup>3</sup>.  
Ачыс мелі, но и сюсь.  
Войнас кыйсьö да оз узь.



Гиж нöдкыв гортса пемöс йылысь.

**284 удж.** Лыдды чолöмалöмсö да бурсиöмсö, велöдчы гижны ачyd.

### Чолöмалам!

1. Ми чолöмалам ассыйным вежаньöс, Елена Васильевнаöс, Чужан лунöн!
2. Муса вежаньным кызь воысь дырджык нин уджалö детсадын.
3. Быдтö-велöдö мян кодь жö вильыш ныв-зонпосниöс.
4. Ми сиамян дона вежаньлы крепыд дзоньвидзалун да ыджыд шуд.
5. Ло пыр татшöм жö вежавидзысьöн, шаньöн, кыпыд сьölöмаöн да нюмбанаöн.
6. А тайö серпасыс мед лоö тэныд мянсянь козинöн.
7. Тэнад вежа ныв-пыд, Таня да Алёша Тимуршевыяс.



1. Медводдза, мöд да нельöд сёрникузяссö гиж, визьнит подувпас да юөрпас.


? 2. Гиж чолöмалана открытка ёртыдлы, пöчыдлы либö пöльыдлы «Йöлöгаö», «Би кинь» журналö, «Коми му» газетö татшöм план серти:


- а) Шыödчöм.
- б) Ас йылысь висьталöм (позьö помас).
- в) Чолöмалöм.
- г) Морт йылысь да сы дорö радейтöм йылысь висьталöм.
- д) Бурсиöм.
- е) Ассыд ним висьталöм.

**285 удж.** Лыдды. Юалөмъяс отсөгөн аддзы сёрникузя-сысь подувпасьяссө да юөрпасьяссө.

Рыт. Лэччис нин шонді. Кыза лысваалис. Көкъяс өддзисны. Чуксасьоны энъ көкъяс ай көкъяскөд. Йөлөга бөрсянныс ю сёртас кузя вөтлысь-лөвтө. Көнкө турун пөвстас матын чөж-пөтка котсө, чуксалө пиянсө, сьортысь-дзедасысь петкөдө ю вылө. Бадь кустын колипкай сьылө.

*В. Чисталёв серти*

 *Ю сёртас — ю визувтан туй.*

 Мыйён петкөдлөма юөрпасьяссө? Төдмав налысь кадсө.



### **35 §. Сёрникузяын содтана юкөдъяс.**

Сёрникузяын, подувпас да юөрпас кындзи, вермасны лоны мукөд кывъяс. Тайö **содтана юкөдъяс.**

*Көнкө турун пөвстын чөж-пөтка котсө.*

**286 удж.** Лыдды текстсө, сэсся гиж.

Вужля дорысь кыпөдчис дозмөр. Сийö лэбзыштис неылө. Петрович матыстчис сы дорө. Пу улын тыдалисны колькъяс. Дозмөр-мам найöс тані пөжис.

 Подувпассө визьнит өти визьён, юөрпассө — кыкөн, содтана юкөдъяссө —  .


**287 удж.** Лыдды, сэссия гиж. Визьнит сюрөса да содтана юкөдьяссө.

Тöлын тарьяс узылöны лым пыын. Сэни найö шонтысьöны. Тарьяс асьнысö видзöны лёк зверьясысь. Мунан тэ вöртi лыжи вылын. Кок улад жугласьöны налөн тыртöм позьясыс.

**288 удж.** Содтав быд сёрникузяö лöсялана содтана юкөдьяс да гиж.

Лэбачьяс тэрмасисны (*кытчö?*) ... . Ланьтiс (*кодьяслөн?*) ... сьылöм. Вөр весьтын (*кыдзи?*) ... лэбалöны ракаяс. (*Кöни?*) ... кливзöны каляяс.

Кымөр ньылыштiс (*мый?*) ... . Сэссия (*кыдзи?*) ... чепöсийис тöv ныр.

 Сёрникузясысь визьнит сюрөса юкөдьяссө.

**289 удж.** Гиж висьтсö комиён. Юрнимав.

Мы готовы к походу. Нина Петровна проверила наши вещи. Мы взяли компас, пищу, воду. Наша группа отъехала от города на машине. Потом мы пошли пешком к озеру. Я наблюдал восход солнца. Над озером показался первый луч.

 Вуджөдöм текстись визьнит сюрөса да содтана юкөдьяс.

**290 удж.** Быд сёрникузяö содтав лöсялана кывьяс да гиж. Визьнит сюрөса юкөдьяссө.

... ыркйöдлö тöвру. ... юргö йöла шы. ... шувгö вөр. ... том кыйсьысь мөдöдчис ... .

### **36 §. Сёрникузяын кывъяслөн йитчём.**

**291 удж.** Лыдды. Петкөдлы юалөмъяс отсөгөн сёрникузясын кывъяслысь йитчёмсö.

#### **Пулөн коланлун.**

Пуяс видзöны мянös жар да лёк поводдяысь. Найö мичмөдöны, гажөдöны мянлысь мунымös.

Пуыд быдлаö колö! И керка лэптыны, и оланінтö шонтыны. Пес öзйö, сетö шоныд. Пуысь вöчöны шкап, пуклös, пыжъяс. Пу дадыяс нуöны мянös лым кузя, му кузя. Пуысь вöчöны кабала. Коръясысь дасътöны лекарство.

Пуяс колöны мортлы олём чöжыс.

В ö ч т а д з и: *Пуяс колöны (кодлы?) мортлы (кор?) олём чöжыс.*



Гиж да визьнит мөд сёрникузяысь сюрöса юкөдыяссö.

**292 удж.** Лыдды да гиж. Петкөдлы кывъяслысь йитчёмсö юалөмъяс сувтөдөмөн.

Пышйö шердын потшös бердөд  
Забор дорсянь паськыд эрдö.  
Шердын бöрся gryмгö вор —  
Ылөдз кылö сылөн гор.

*Илля Вась*



*Рач — скөвөрöда.*

*Шердын — нянь корка вöчём-быглялём могысь  
джуджыд дорьяса паськыд пу тасьтi.*

## 293 удж. Лосьод сёрникузяс да гиж.

<i>Кутшөм?</i>	<i>Коді? Мый?</i>	<i>Мый вөчө? (Мый вөчис?)</i>	<i>Көні? (Кытчө?)</i>
вөсни кока	көч	кокасис	пу вылын
гөрд юра	чушканзі	олө	нюрын
кузь пеля	бадь пу	поздысис	мыр бокин
чегөм коска	тури	кывзысис	берег пөлөн
вежөдөм	сизь	быдмис	вевт улө

**294 удж.** Артмөд сетөм кывъясысь сёрникузяс. Мөвпав, юалөмъяс отсөгөн петкөдлы кывъяслысь йитчөмсө.

1. Дзользьёны, лэбачьяс, пармаын. 2. Шонді, вөр, сайысь, югид, мыччысис. 3. Пыдөстөм, лөз, нюмъёвтіс, енэжыс. 4. Ломзисны, туганъясыс, пожөмлөн.

**295 удж.** Гиж. Кужөмөн содтав кыв вежлалан суффиксяс. Төдмав эмакывъяслысь вежлөгьяссө.

Вель ыджыд места челядь олөм... босьтөны ворсөмъяс. Ворсөм пырыс найө төдмасьёны удж... , велөдчөны вөчны сійөс жө, мый и налөн мам-бадь. Ворсөм отсалө налы быдмыны-сөвмыны вына, смел, сюсь йөз... .

**296 удж.** Гиж. Юалөмъяс отсөгөн торйөдөм сёрникузясысь петкөдлы кывъяслысь йитчөмсө.

**Во джын ыджыдаліс төв.** Но выныс заводитіс чинны. Шонді петөм бөрын **синваыс** тєпкис **войтваөн**. Лымйыс рудөдіс да ляпкаліс. А **лунвыв** бана керөсьяс сьөдөдісны. **Аски-аскомысь лунвывсянь воасны скворечьяс.**



1. Висьтав гижанногсө торйөдөм кывъяслысь.
2. Визьнит сёрникузяслысь подувсө.

## \* Отсөг вылө:

**6 удж.** 1) ус-сус-бус-мус; 2) пыж-пож-пуж.

**13 удж.** Синъяс.

**27 удж.** Мыссьыны, киссьё, лыддьё, аттьё, вощё.

**59 удж.** 1) вөрөшитны; 2) арös; 3) воыны; 4) войвывса;  
5) джодждөра; 6) юсайса.

**80 удж.** 2) гымалö; 3) соласьö; 4) тшакла; 5) бательн;  
6) пысалi; 7) ёрткөд; 8) сёйышта.

**86 удж.** Кыв тэчас серти: югыд-вокыд, серам-видзам,  
гижа-гажа.

**94 удж.** 1) коз; 2) юква; 3) ты; 4) купеч; 5) бать;  
6) форма; 7) тшöка.

**167 удж.** 1) мазi; 2) Куратов; 3) ньөр; 4) шы; 5) ты.

**208 удж.** Сёрникузяс костын йитöдъяс: сизь — лэбач —  
сйöс; гаг ли — пучöй ли — кодъяс; **а** кывйитöд.

**214 удж.** Текст артмöдысь йитöдъяс: а) öти кыв мöд  
кывйөн вежöm: кельöб — сйö, уткаяс — кодъяскö; Сыктив —  
татчö; б) действие ног да кад петкөдлысь кывъяс: друг, сiдзи.

**235 удж.** Лöсвятöm кыв — кадакывъяс кад, лыд сертиыс.



## Юриндалысь

1 §. Мөд классын велөдөмтор мөдпөвсталөм. Текст. Шыяс да шыпасъяс. Слог .....	4
2 §. Кык дз шыа кивъяс .....	9
3 §. Орччөн сулалысь кык өткодь небыд согласнөя кивъяс .....	11
4 §. Орччөн сулалысь кык разнөй небыд согласнөя кивъяс .....	15
5 §. Торйөдан ь да ь пасъяс гижөм .....	17
6 §. Торйөдан ь да ь пасъяс кивъяс визьысь визьö вуджөдөм .....	22
7 §. Кыв тэчас. Кыввуж .....	25
8 §. Суффиксъяс. Кыв вежлалан суффиксъяс .....	27
9 §. Выль кыв артмөдысь суффиксъяс .....	30
<i>Төдөмлун</i> <i>Вынсьөдөм Вылө уджъяс</i> .....	37
10 §. Кывсикасъяс .....	38
11 §. Эмакыв .....	40
12 §. Эмакывлөн лыд .....	43
13 §. Эмакывлөн вежлөг .....	46
14 §. Эмакыв вежлөгъяслөн юалөмъяс да суффиксъяс .....	48
15 §. Уна лыда эмакывлөн вежлөг суффиксъяс .....	51
16 §. Эмакыв вежлөг суффиксъяс гижанног .....	56
17 §. Рочысь пырөм эмакывъяс гижанног .....	59
18 §. Тэчас (сложнөй) эмакывъяс .....	61
19 §. Визь пыр гижан тэчас эмакывъяс .....	63
20 §. Эмакывъяскөд кывбөръяс гижөм .....	67
<i>Төдөмлун</i> <i>Вынсьөдөм Вылө уджъяс</i> .....	71
21 §. Нимвежтас .....	72
22 §. Нимвежтасъяскөд кывбөръяс гижөм .....	77
23 §. Кадакыв .....	81
24 §. Кадакывъяслөн лыд серти вежласьөм .....	87
25 §. Кадакывъяслөн кад серти вежласьөм .....	90
26 §. Öнiя када кадакывъяс .....	92
27 §. Локтан када кадакывъяс .....	95
28 §. Колян када кадакывъяс .....	97
<i>Төдөмлун</i> <i>Вынсьөдөм Вылө уджъяс</i> .....	101
29 §. Кывберд .....	103
30 §. Сёрникузя. Юөртана сёрникузя .....	108
31 §. Юалана сёрникузя .....	109
32 §. Горөдана сёрникузя .....	113
33 §. Подувпас .....	117
34 §. Юөрпас .....	120
35 §. Сёрникузяын содтана юкөдъяс .....	122
36 §. Сёрникузяын кивъяслөн йитчөм .....	124

Авторы выражают благодарность Игушевой Анне Ивановне,  
редактору редакционно-издательского отдела КРИРОиПК, за оказанную помощь в  
подготовке рукописи учебника

---

*Рекомендовано  
Министерством образования и  
высшей школы Республики Коми*

Учебное издание

*Тамара Ивановна Прокушева  
Ольга Ивановна Изъюрова*

**Екатерина Александровна Кузванова**

*Светлана Алексеевна Мишарина*

## **КОМИЯЗЫК**

Учебник для 3 класса

Редактор *В.М. Грабежова*  
Корректор *В.И. Трошева*  
Художник обложки *Г.Н. Шарипков*  
Компьютерная верстка *З.А. Поздеева*

Подписано в печать 10.10.07

Формат 70×90<sup>1</sup>/<sub>16</sub>

Бумага офсетная

Печать офсетная

Усл.-печ. л. 9,36

Уч.-изд. л. 5,0

Тираж 900 экз.

Заказ № 27405

167982 г. Сыктывкар, Карла Маркса, 229, ООО «Анбур»

Отпечатано в ООО «Коми республиканская типография»  
167982, г. Сыктывкар, ул. Савина, 81





КОМИ  
КЫВ 3